

ROMANOS

Jun cha'an jini año' bΛ ti Roma

¹ Pablojon i winicon Cristo Jesús. PΛybilon cha'an mic majlel ti subt'an. Dios tsi' yΛq'ueyon que'tel ti' t'an.

² JiñΛch jini wen t'an tsa' bΛ i wΛn subu Dios ti ch'ujul bΛ i Ts'ijbujel, ts'ijbubil bΛ i cha'an x'alt'añoob.

³ JiñΛch jini wen t'an mu' bΛ i tsictesan i Yalobil Dios tsa' bΛ i yila pañimil tilem bΛ ti' p'olbal David.

⁴ Tsa' wen tsictiyi i YalobilΛch Dios ti' p'ΛtΛlel yic'ot ti' yEspíritu Dios che' bΛ tsa' tejchi loq'uel ba'an chΛmeño' bΛ lac Yum Jesucristo.

⁵ Tsi' yΛq'ueyon lojon i yutsllel i pusic'al che' bΛ tsi' pΛyΛyon lojon ti apóstol ti' tojlel winicob x'ixicob ti pejtelel pañimil cha'an mi' ñopob Jesucristo, cha'an mi' jac'beñoob i t'an.

⁶ Jatetla ja'el pΛybiletla i cha'an Jesucristo lajal bajche' año' bΛ. I cha'añetla.

⁷ Wolic ts'ijbubeñetla jini jun pejteletla añet bΛ la ti Roma. C'uxbibiletla i cha'an Dios tsa' bΛ i pΛyΛyetla cha'an mi' la' wochel ti ch'ujul. La' i yΛq'ueñetla Dios yic'ot lac Yum Jesucristo i yutsllel yic'ot i ñΛch'tilel i pusic'al.

Pablo yom majlel ti Roma

⁸ Ñaxan mic suben Dios wocolix i yΛΛ ti Jesucristo cha'an pejteletla, come woli ti ajlel ti pejtelel pañimil bajche' tsa' la' ñopo Cristo.

⁹ Yujil Dios wolic ch_Λn ña'tañetla ti pejtelel ora che' mic pejcan. Mic melben i ye'tel Dios ti pejtelel c pusic'al ti jini wen t'an mu' b_Λ i tsictesan i Yalobil Dios.

¹⁰ Anix ora woliq c'ajtiben Dios j colt_Λntel cha'an mic majlel ba' añetla mi che' yom Dios.

¹¹ Com j q'ueletla cha'an mi c_Λq'ueñetla la' c_Λn la' majtan ch'oyol b_Λ ti Espíritu, cha'an mi la' xuc'chocontel.

¹² Com j q'ueletla cha'an mi lac tem ñuq'ues_Δben lac b_Λ lac pusic'al, come ti jump'ejl lac pusic'al woli lac ñop.

¹³ Come yom mi la' ña'tan, hermanojob, anix ora wolic ña'tan tilel ba' añetla. C'_Λl_Λl w_Λle an chuqui tsi' m_Δctayon. Com tilel cha'an mi' p'ojlel xñopt'añob ti la' tojlel che' bajche' ti' tojlel yaño' b_Λ gentilob.

¹⁴ Come an tic wenta jini wen t'an cha'an mic subeñob griegojob yic'ot mach b_Λ griegojobic, jini c_Λntes_Δbilo' b_Λ yic'ot jini mach b_Λ c_Λntes_Δbilobic.

¹⁵ Jini cha'an ti pejtelel c pusic'al comix c subeñetla jini wen t'an añet b_Λ la ti Roma.

¹⁶ Ma'anic mic cha'len quisin cha'an jini wen t'an, come jiñach i p'_Δt_Δlel Dios cha'an mi' coltan pejtelel mu' b_Λ i ñopob, ñaxan jini israelob, wi'il jini griegojob.

¹⁷ Ti jini wen t'an mi' tsictiyel toj b_Λ i pusic'al Dios mu' b_Λ i y_Λq'ueñonla che' mi lac ñop, cha'an ch_Λn xuc'ul mi lac ñop che' bajche' ts'ijbubil: “Jini mu' b_Λ i q'uejlel ti toj cha'an tsi' ñopo Dios ch_Λn cuxul mi caj i yajñel come xuc'ul Dios”.

Woli' tsictiyel i mich'ajel Dios ti' contra winicob

18 Come woli' tsictiyel i mich'ajel Dios ya' ti panchan. Woli' jubel ti' contra pejtelel i jontolil yic'ot i mul winicob x'ixicob, mu' b_Λ i ma_Λtañob i sujmllel yic'ot i jontolil.

19 Come mi mejlel i cañob chuqui tac pa_Λsbebilob ti Dios ila ti pañimil, come Dios tsi' tsictes_Λbeyob.

20 C'_Λl_Λl ti' tejchibal pañimil tsiquil añ_Λch Dios, come tsiquil i melbal. Anquese ma'anic mi laj q'uel ti lac wut, tsiquil i p'_Λt_Λlel yic'ot i ña'tibal mach b_Λ anic mi' jilel. Jini cha'an b_Λjob_Λch i b_Λ che' ma'anic mi' ñopob.

21 Anquese tsi' cañ_Λyob Dios, ma'anic tsi' ch'ujutesayob. Ma'anic tsi' subeyob wocolix i y_Λl_Λ. Tsa' lon tejchi i bajñel ña't_Λbal. Utsilix tsa' p'ojli tonto b_Λ i pusic'al.

22 Che' b_Λ tsi' lon ña'tayob cab_Λl_Λch i pusic'al tsa' ochiyob ti tonto.

23 Tsi' ca_Λy_Λyob jini ñuc b_Λ Dios mach b_Λ yujilic jilel. Tsi' diosiyob i yejtal winic mu' b_Λ i jilel, yic'ot i yejtal te'lemut, yic'ot i yejtal jini cotel b_Λ, yic'ot i yejtal jini j_Λl_Λcña b_Λ.

24 Jini cha'an Dios tsi' ca_Λy_Λyob ti' ts'i'lel, come wo'atax i pusic'alob ti mulil. Quisintic jax bajche' tsi' c'_Λñ_Λyob i bac'tal.

25 Tsi' ca_Λy_Λyob i sujmllel Dios cha'an mi' ñopob lot. Tsi' ch'ujutesayob jini melbil tac b_Λ. Tsi' melbeyob i q'uiñilel. Ma'anic tsi' ch'ujutesayob Dios tsa' b_Λ i mele pejtelel chuqui tac an, jini yom b_Λ mi lac sub ti ñuc ti pejtelel ora. Amén.

26 Jini cha'an Dios tsi' ca_Λy_Λyob come woli' melob quisintic jax b_Λ i colosojlel i pusic'al. Come jini x'ixicob i cha'año' b_Λ tsi' ca_Λy_Λyob i c'_Λjñibal winicob. Tsi' laj b_Λ pi'leyob i b_Λ.

27 Che' ja'el winicob tsi' cʌyʌyob i cʌjñibal x'ixicob. Tsi' wʌʌc pi'leyob i bʌ. Wo'ob jax ti' ts'i'lel. Quisintic jax bajche' tsi' meleyob laj bʌ winicob. Tsa' aq'uentiyob i tojol i mul che' bajche' an i jontolil.

28 Mach yomobic i wis ña'tan Dios. Jini cha'an Dios tsi' cʌyʌyob cha'an mi' ña'tañob chuqui tac bibi' yic'ot cha'an mi' cha'leñob chuqui tac mach wenic.

29 But'ulob ti jujunchajp jontolil, yic'ot i ts'i'lel, yic'ot i mulʌntel chubʌ'añʌl, yic'ot ts'a'leya. But'ulob i pusic'al ti' tsʌytsʌyñʌyel cha'an i wenlel i pi'ʌlob, yic'ot tsʌnsa, yic'ot leto, yic'ot lotiya, yic'ot a'leya, yic'ot u'yaj t'an.

30 Mi' cha'leñob wulwul t'an yic'ot jop't'an. Mi' ts'a'leñob Dios. Mi' p'ajob i pi'ʌlob. C'ax ñuc mi' p'isob i bʌ. Mi' ña'tañob i melob jontolil. Mi' ñusʌbeñob i t'an i tat i ña'.

31 Tontojob, mach xuc'ulobic i pusic'al. Mach yujilobic c'uxbiya, mi p'untaya, mi ts'ita'ic.

32 Anquese ña'tʌbil i cha'añob tsa'ix i yʌc'ʌ mandar Dios cha'an mi' chʌmel jini mu' bʌ i mel bajche' jini, mi' chʌn melob. Mi' c'uxbiñob ja'el jini mu' bʌ i melob jontolil lajal bajche'ob.

2

Dios mi' cha'len meloñel ti toj

1 Jini cha'an mi wola' q'uel ti xmulil a pi'ʌlob, an a mul come mach a wentajic cha'an ma' melob. Come majqui jach mi' sub i mul i pi'ʌlob woli' bajñel tsictesan i mul, come lajalʌch i mul yic'ot.

2 La cujil Dios mi' cha'len meloñel ti toj ti' contra jini mu' bʌ i cha'leñob mulil.

³ Jatet mu' b_Λ a sub i mul a pi'Λlob che' lajal wola' cha'len mulil, ¿mu' ba a lon ña'tan mi caj a loq'uel ti uts'at che' mi' melet Dios?

⁴ ¿Mu' ba a lon ñus_Λben on b_Λ i yutslel i pusic'al Dios? ¿Mu' ba a lon ñusan che' jal woli' cuchbeñet a mul ti' yutslel i pusic'al? ¿Mach ba a wujilic, Dios mi' p_Λsbeñet i yutslel i pusic'al cha'an ma' c_Λy a mul?

⁵ Ts_Λsatax a pusic'al. Ma'anic ma' c_Λy a mul. Che' jini wola' w_Λc' ti temp_Λyel i mich'ajel Dios cha'an i q'uiñilel mich'ajel che' mi' caj ti tsictiyel bajche' mi' cha'len meloñel Dios ti toj.

⁶ Dios mi caj i y_Λq'ueñob i chobejt_Λbal che' bajche' an i melbal ti jujuntiquil.

⁷ Jini mu' b_Λ i ch_Λn cha'leñob chuqui uts'at cha'an yomob i ñucl_Λel yic'ot i c'uxbintel yic'ot i cuxt_Λlel mach b_Λ anic mi' jilel, mi caj i y_Λq'uentelob i cuxt_Λlel mach b_Λ anic mi' jilel.

⁸ Pero jini mu' b_Λ i melob che' bajche' yom i bajñel pusic'al mach b_Λ anic mi' ñopob chuqui isujm, jini mu' b_Λ i cha'leñob jontolil, mi caj i tajbeñob i mich'ajel Dios. Dios mi caj i y_Λ'leñob.

⁹ Mi caj i tajob cab_Λl wocol yic'ot tsic pusic'al pejt_Λel mu' b_Λ i cha'leñob jontolil, ñaxan jini israelob, ti wi'il jini griegojob.

¹⁰ Mi caj i taj i ñucl_Λel yic'ot i c'uxbintel yic'ot i ñach'tilel i pusic'al jini mu' b_Λ i cha'len chuqui uts'at, ñaxan jini israelob, ti wi'il jini griegojob.

¹¹ Come Dios mach jelchojquic jach mi' c'uxbin winicob x'ixicob.

¹² Jini mach b_Λ anic tsi' yubiyob mandar mi caj i jilelob cha'an i mul. Ma'anic mi caj i c'_Λn mandar Dios cha'an mi' melob. Pero jini tsa' b_Λ i yubiyob

mandar, tsa' b_Λ i ñusayob, Dios mi caj i c'Λn jini mandar cha'an mi' melob.

¹³ Come mach tojobic ti' wut Dios jini mu' b_Λ i lon ubiñob mandar, cojach jini mu' b_Λ i jac'ob jini mandar mi' ch'Λjmelob ti' wenta.

¹⁴ Come jini gentilob mach b_Λ anic i cha'añob jini ts'ijbubil b_Λ mandar, an i cha'añob i mandar Dios ti' pusic'al che' mi' bajñel melob che' bajche' ts'ijbubil, anquese mach i cΛñΛyobic jini ts'ijbubil b_Λ.

¹⁵ Mi' tsictesañob jini mandar ts'ijbubil b_Λ ti' pusic'alob. Mi' bajñel ña'tañob ti' pusic'al mi' toj woli' melob o mi mach tojic.

¹⁶ Ti' q'uiñilel meloñel, Dios mi caj i c'Λn Jesucristo cha'an mi' mel winicob x'ixicob cha'an jini mucul tac b_Λ tsa' b_Λ i meleyob che' bajche' mi' yΛ jini wen t'an mu' b_Λ c sub.

Israelob mu' b_Λ i ñopob jini ts'ijbubil b_Λ mandar

¹⁷ Jatet israelet b_Λ ma' ñop jini ts'ijbubil b_Λ mandar. Ñuc ma' lon q'uel a b_Λ cha'an wola' ñop Dios.

¹⁸ CΛmbil a cha'an chuqui yom Dios. Ma' ña'tan chuqui wen uts'at, come cΛntesΛbilet ti' jini mandar.

¹⁹ Ma' lon ña'tan xtoj'esayajet cha'an xpots'ob. Ma' lon ña'tan i sΛclelet pañimil cha'an jini año' b_Λ ti' ac'Λlel.

²⁰ Ma' lon ña'tan maestrojet cha'an jini tontojob, xcΛntesajet cha'an alobob. Ma' lon ña'tan cabΛΛch a ña'tΛbal ti' jini mandar yic'ot i sujmllel.

²¹ Jatet ma' cΛntesan a pi'Λlob. ¿Chucoch ma'anic ma' bajñel cΛntesan a b_Λ? Ma' sub mach wenic xujch'. ¿Mu' ba a cha'len xujch'?

22 Ma' w_Λl mach wenic ts'i'lel. ¿Mu' ba a cha'len ts'i'lel? Ma' ts'a'len dios tac. ¿Mu' ba a xujch'iben i chub_Λ'an jini templo tac?

23 Ñuc ma' lon sub a b_Λ cha'an jini mandar. ¿Mach ba wolic a ts'a'len Dios che' ma' ñus_Λben i mandar?

24 Come jini gentilob mi' p'ajbeñob i c'aba' Dios cha'an ti la' melbal che' bajche' ts'ijbubil.

25 Come an i c'ajñibal tsep p_Λch_Λlel mi wola' jac' jini mandar, pero mi wola' ñusan mandar, lolom jach tsepbil a p_Λch_Λlel.

26 Jini mach b_Λ tsepbilic i p_Λch_Λlel mi tsi' mele chuqui tac toj mu' b_Λ i y_Λl jini mandar, ¿mach ba tsepbilic i p_Λch_Λlel yilal ti' tojlel Dios?

27 Mi ts'_Λc_Λl tsi' jac'_Λ jini mandar jini mach b_Λ tsepbilic i p_Λch_Λlel, ¿mach ba muq'uc i tsictesan a mul? come wola' ñusan mandar che' an a cha'an jini ts'ijbubil b_Λ mandar yic'ot tsep p_Λch_Λlel.

28 Come mach mero israelobic pejtél i p'olbal Israel. Jini mero tsep p_Λch_Λlel ja'el mach jinic am b_Λ ti lac b_Λc'tal.

29 Mero israelonla che' tojonla ti' wut Dios. Mero tsep p_Λch_Λlel jini am b_Λ ti lac pusic'al, mach ti lac b_Λc'talic, i melbal_Λch jini Espíritu. Jini mero israel mi' taj i ñuclél ti Dios, mach ti winicobic.

3

Xuc'ul Dios

1 ¿Am ba chuqui ñumen uts'at i cha'añob israelob bajche' gentilob? ¿Chuqui mi' taj jini tsepbilo' b_Λ i p_Λch_Λlel?

2 Cab_Λl, come jiñob_Λch tsa' b_Λ aq'uentiyob i t'an Dios ti ñaxan.

³ Isujm, ma'anic tsi' ñopoyob lamital, pero ¿tsa' ba jili i xuc'tilel i pusic'al Dios cha'an ma'anic tsi' ñopoyob?

⁴ Ma'anic. Anquese xlotob pejtelel winicob, mach yujilic lot Dios. Che' bajche' ts'ijbubil ti Salmos: “Toj^Λch chuqui mi' y^Λ Dios ti pejtelel ora. Ma'anic majqui mi mejlel i y^Λ mach tojic Dios”, che'en.

⁵ Lac jontolil ja'el mi' tsictesan toj b^Λ i pusic'al Dios. ¿Chuqui mi la c^Λ, che' jini? ¿Yom ba mi la c^Λ mach tojic Dios che' mi' y^Λc'onla ti tojmulil? Che'^Λch mi' lon alob winicob.

⁶ Mach che'ic yom. Mi mach tojic Dios, ¿bajche' mi mejlel i mel pejtelel winicob x'ixicob año' b^Λ ti pañimil?

⁷ Mi' y^Λlob: Mi woli lac tsictesan i sujmllel Dios yic'ot lac lot, mi woli la c^Λc' ti c^Λjñel i ñucllel Dios, ¿chucoch mi' q'uelonla ti xmulil che' jini? lon che'ob.

⁸ ¿Yom ba mi la c^Λ: La' lac cha'len jontolil cha'an mi' p'ojlel chuqui tac uts'at? Mach yomic. Woliyob ti lot mu' b^Λ i y^Λlob che'^Λch wolic sub lojon. Mi caj i y^Λjq'uelob ti tojmulil che' bajche' yom.

Ma'anic majqui toj

⁹ Jixcu jini judíojob, ¿mu' ba i lon ña'tañob tojob? ¿Mach ba lajalobic bajche' jini gentilob? Lajalob cu, come tsa'ix c subu lojon an i mul israelob yic'ot gentilob, come ti pejtelonla chuculonla ti' p'^Λt^Λlel mulil.

¹⁰ Che' bajche' ts'ijbubil: “Ma'anic majqui toj, mi juntiquilic.

¹¹ Ma'anic majqui mi' ch'^Λmben isujm. Ma'anic majqui yom i ñop Dios.

12 Ti pejtelonla tsa' sajtiyonla ti bij. Ma'anic laj c'ajñibal. Ma'anic majqui mi' cha'len chuqui wen, mi juntiquilic.

13 Lajal i yej winicob bajche' i ti' mucuñibal. Mi' cha'leñob lot. An i venenojlel lucum ti' mal i yej.

14 Mi' cha'leñob p'ajoñel yic'ot wajleya.

15 Ajñel mi' majlelob i tsansañoob i pi'lob.

16 Baqui jach mi' majlelob mi' techob wocol yic'ot jisaya.

17 Mach i canayobic jini bij ba' ñach'al lac pusic'al.

18 Ma'anic mi' wis bac'ñañoob Dios". Che'ach ts'ijbubil.

19 La kujil an ti' wenta jini mu' ba i yubiñoob mandar cha'an mi' jac'ob ti pejtelel. Aq'uebilob cha'an mi' ñajch'elob yic'ot pejtel winicob x'ixicob ti pañimil che' mi' melob i ba ti' tojlel Dios.

20 Jini cha'an mach cha'anic i jac'ol mandar mi' ñusabeñoonla lac mul Dios che' mi' yotsañoonla ti' wenta. Come jini mandar mi' yaq'ueñoonla lac ña'tan lac mul.

Dios mi' yaq'uen toj ba i pusic'al jini mu' ba i ñop

21 Wale tsa'ix tsictiyi toj ba i pusic'al Dios mu' ba i yaq'uen winicob x'ixicob mach ba anic tsi' jac'ayob jini mandar. I juñilel mandar yic'ot i juñilel x'alt'añoob tsi' yac'a ti cajnēl toj ba i pusic'al Dios.

22 Jiñach toj ba i pusic'al mu' ba i yaq'uentelob pejtel mu' ba i ñopob Jesucristo, come Dios mach jelchojquic mi' q'uelob.

23 Come ti pejtelelob tsa'ix i cha'leyob mulil. Mach i tajayobix i ñuclel Dios.

24 Dios mi' yotsañob ti' wenta cha'an jach i yut-slel i pusic'al. Mi' ñusΛbeñob i mul ti' majtan jach, come Cristo Jesús tsi' mañΛyob cha'an mi' yΛc'ob ti' colol.

25 Come Dios tsi' wa'choco Cristo cha'an mi' tojbeñob i mul yic'ot i ch'ich'el, cha'an mi' lajmel i mich'ajel ti' tojlel pejtél mu' bΛ i ñopob. Che' jini tsiquil tojΛch Dios tsa' bΛ i to'ol q'uelbeyob i mul winicob x'ixicob ti' yambΛ ora che' woli to i cuchbeñob i mul.

26 La cujil tojΛch mi' mel xmulilob. TojΛch Dios mu' bΛ i yotsañob ti' wenta che' mi' ñusΛbeñob i mul pejtél mu' bΛ i ñopob Jesús.

27 ¿Mu' ba lac chΛn sub lac bΛ ti' ñuc? Ma'anic. ¿Chucoch? ¿Mach ba anic lac ñuclel cha'an ti' jac'ol jini mandar? Ma'anic. Come mach cha'anic i jac'ol mandar mi' ñusΛbeñonla lac mul Dios che' mi' yotsañonla ti' wenta, pero cha'an jach tsa' lac ñopo Jesús.

28 Tsiquil che' jini, Dios mi' ñusan lac mul. Mi' yotsañonla ti' wenta cha'an tsa' lac ñopo Jesús, mach cha'anic i jac'ol mandar.

29 Lac Dios ¿i cha'an jach ba israelob? ¿Mach ba i cha'anic gentilob ja'el? I cha'an cu ja'el.

30 Come juntiquil jach Dios. Mi' caj i yot-san ti' wenta pejtél mu' bΛ i ñopob, jini tsepbil bΛ i pΛchΛlel yic'ot ja'el jini mach bΛ tsepbilic i pΛchΛlel.

31 ¿Mu' ba lac jisan i c'Λjñibal mandar che' mi' lac ñop Jesús? Ma'anic. Mi' lac chΛn ña'tΛben i c'Λjñibal mandar.

Abraham tsi' ñopo Dios

¹ ¿Chuqui yom mi la cΛ che' jini? ¿Chuqui tsi' taja Abraham jini lac ñojte'el?

² Dios tsi' ñusΛbe i mul Abraham. Tsi' yotsa ti' wenta, pero mach cha'anic wen bΛ i melbal. Tsa'ic i ch'ΛmΛ ti' wenta cha'an wen bΛ i melbal, tsa' mejli i sub i bΛ ti' ñuc, pero mach ti' tojlelic Dios.

³ ¿Chuqui mi' yΛ i Ts'ijbujel Dios? “Abraham tsi' ñopo Dios. Jini cha'an Dios tsi' q'uele ti toj”, che'en.

⁴ Come jini mu' bΛ i cha'len e'tel ti ganar mi' ch'Λm i tojol. Mach i majtanic. I ganarΛch.

⁵ Pero Dios mi' ñusΛbeñob i mul jini mach bΛ tojobic mu' bΛ i ñopob. Mi' yotsañob ti' wenta. Dios mi' q'uelob ti toj cha'an jach tsi' ñopoyob, mach cha'anic ti wen bΛ i melbal.

⁶ David ja'el tsi' subu bajche' an i tijicñayel i pusic'al jini winic mu' bΛ i q'uejlel ti toj ti Dios anquese ma'anic wen bΛ i melbal.

⁷ David tsi' yΛΛ: “Tijicñayob jini ñusΛbilo' bΛ i jontolil, yic'ot jini mach bΛ chΛn ña'tΛbilibic i mul ti Dios.

⁸ Tijicña jini winic mach bΛ anic mi' ña'tibentel i mul ti lac Yum”. Che'tsi' yΛΛ David.

⁹ ¿Cojach ba tijicñayob jini tsepbilo' bΛ i pΛchΛlel? ¿Mach ba tijicñayobic ja'el jini mach bΛ tsepbilobic i pΛchΛlel? Mic sub lojon tsa' q'uejli ti toj Abraham cha'an tsi' ñopo Dios.

¹⁰ ¿Baqui ora tsa' q'uejli ti toj? ¿Tsa' ba q'uejli ti toj che' tsepbilix i pΛchΛlel o che' maxto tsepbilic? Tsa' q'uejli ti toj che' maxto tsepbilic i pΛchΛlel.

¹¹ Ti wi'il tsa' tsepbenti i pΛchΛlel Abraham cha'an i yejtal yic'ot i sellojlel toj bΛ i pusic'al tsa' bΛ aq'uenti cha'an tsi' ñopo Dios che' maxto

tsepbilic i p^Λch^Λlel. Jini cha'an tsa' ochi Abraham ti' tat pejtelelob mu' b^Λ i ñopob Dios anquese mach tsepbilobic i p^Λch^Λlel, cha'an mi' q'uejlelob ti toj ja'el.

¹² I tat^Λch ja'el jini tsepbilo' b^Λ i p^Λch^Λlel mu' b^Λ i ñopob. Mach cojic jach tsi' ch'^Λm^Λyob tsep p^Λch^Λlel, pero tsi' ñopoyob. Che' jini woli' tsajcañob lac tat Abraham tsa' b^Λ i ñopo Dios che' maxto tsepbilic i p^Λch^Λlel.

An chuqui mi' y^Λq'uentel che' mi' ñop Dios

¹³ Tsa' q'uejli ti toj Abraham cha'an tsi'ñopo Dios. Jini cha'an Dios tsi' y^Λq'ue i t'an. Mach cha'anic ti' jac'ol jini mandar, pero cha'an ti' ñopol Dios tsa' subenti Abraham yic'ot i p'olbal mux i y^Λq'uentelob jini pañimil ti' wenta.

¹⁴ Mi wersa mi lac jac' jini mandar cha'an mi la c^Λq'uentel, che' jini lolom jach mi lac ñop, lolom jach tsi' y^Λc'Λ i t'an Dios.

¹⁵ I ñus^Λntel mandar mi' tech mich'ajel, pero che' ma'anic mandar ma'anic mi' ñus^Λntel.

¹⁶ Jini cha'an mi lac taj jini albil b^Λ ti' yutslal i pusic'al Dios cha'an tsa' lac ñopo Dios. Che' jini mi' ts'^Λtiyel jini t'an ti' tojlel pejtal i p'olbal Abraham mu' b^Λ i ñopob Dios, mach cojic jach mu' b^Λ i ñopob mandar, pero yañob' b^Λ ja'el mu' b^Λ i ñopob Dios che' bajche'Abraham. Jiñ^Λch lac tat ti lac pejtelel.

¹⁷ Che' bajche' ts'ijbubil: “Dios tsi' yotsa Abraham ti' tat winicob x'ixicob ti cab^Λ lum tac”, che'en. Dios^Λch mu' b^Λ i y^Λq'ueñob i cuxtielel ch^Λmeño' b^Λ, mu' b^Λ i mel ti' p'^Λt^Λlel jach i t'an jini tsiquil tac b^Λ mach b^Λ anic ti yamb^Λ ora.

18 Anquese ma'anic tsi' ña'ta Abraham bajche' mi' caj ti ts'actiyel jini t'an, tsi' ch_ΛN ñopo ti' xuc'tilel i pusic'al, isujm mi' caj i yochel ti' tat cab_Λl winicob x'ixicob ti cab_Λl lum, come tsa' subenti: “Che'i mi' caj ti ajñel a p'olbal”.

19 Ma'anic tsa' lujb'a i ñop anquese tsi' ña'ta ma'anix i yorajlel cha'an mi' yajñel i yalobil, come ts'ita' yom mi' ts'actiyel jo'c'al i jabil. Che' ja'el xñejep'ix jini Sara.

20 Ma'anic tsi' wis c_Λy_Λ i ñop. Ma'anic tsa' tejchi tile bixel b_Λ i pusic'al cha'an jini t'an tsa' b_Λ subenti ti Dios. Tsa' p'at'a i pusic'al ti jini tsa' b_Λ i ñopo. Tsi' subu i ñuclel Dios.

21 Ti jump'ejl i pusic'al yujil an i p'at_Λlel Dios cha'an mi' mel chuqui tsi' y_ΛΛ.

22 Jini cha'an tsa' q'uejli ti toj cha'an tsi' ñopo Dios.

23 Mach cha'anic jach Abraham, tsa' ts'ijbunti jini t'an “Tsa' q'uejli ti toj”.

24 Pero cha'añonla ja'el mu' b_Λ lac ñop Dios, tsa' b_Λ i teche ch'ojoyel lac Yum Jesús ba'an ch_Λmeño' b_Λ. Joñonla ja'el mi' laj q'uejlel ti toj.

25 Come Jesús tsa' ajq'ui ti ch_Λmel cha'an mi' toj lac mul. Tsa' tejchi cha'an mi' laj q'uejlel ti toj.

5

I ñach't_Λlel lac pusic'al yic'ot i tijicñ_Λyel

1 Dios tsa'ix i ñus_Λbeyonla lac mul. Tsa'ix i yotsayonla ti' wenta cha'an tsa' lac ñopo Cristo. Ma'anix woli laj contrajin Dios, come tsi' yuts'esayonla lac Yum Jesucristo.

² Cha'an Jesucristo mu' b_Λ lac ñop, ochemonixla ja'el ti' yutslel i pusic'al. Jini cha'an xuc'ulonla. Tijicñayonla cha'an mi caj lac taj i ñucllel Dios.

³ Mach cojic jach jini. Tijicñayonla ja'el cha'an jini wocol mu' b_Λ la cubin, come la cujil jini wocol mi' y_Λq'ueñonla lac p'_Λt_Λlel ti pijt.

⁴ Che' an chuqui mi lac ch_Λn pijtan, mi' xuc'chocontel lac pusic'al. Jini i xuc'tilel lac pusic'al mi' c_Λntesañonla tal lac wenlel ti Dios.

⁵ Mach lolomic jach woli lac pijtan, come la cujil Dios tsa'ix i y_Λq'ueyonla jini Ch'ujul b_Λ Espíritu cha'an mi' but'beñonla lac pusic'al ti' c'uxbiya.

⁶ Che' ma'anic tsa' mejli laj coltan lac b_Λ, tsa' ch_Λmi Cristo cha'añonla tsa' b_Λ lac ñusa Dios.

⁷ Ma'anic mi la c_Λc' lac b_Λ cha'an i colt_Λntel juntiquil toj b_Λ, anquese tic'_Λl mi an majch mi' y_Λc' i b_Λ ti ch_Λmel cha'an mi' coltan juntiquil uts b_Λ.

⁸ Pero tsa' ch_Λmi Cristo cha'añonla che' xmulilon tola. Che' jini, Dios tsi' p_Λsbeyonla c'ux mi' yu-biñonla.

⁹ Ñ_Λs_Λbilix lac mul, añonixla ti' wenta Dios cha'an ti' ch'ich'el Cristo. Jini cha'an ñumen mi caj laj colt_Λntel ti Cristo che'mi' tsictiyel i mich'ajel Dios.

¹⁰ Che' i contrajonla Dios, tsa' ch_Λmi i Yalobil cha'an mi' yutsesan lac pusic'al yic'ot Dios. W_Λle che' lac pi'_Λlix lac b_Λ la quic'ot Dios, ñumen mi caj laj colt_Λntel cha'an tsiji' b_Λ i cuxtilel Cristo.

¹¹ Mach cojic jach jini, pero tijicñayonla ti Dios cha'an lac Yum Jesucristo, come tsi' yuts'esa lac pusic'al yic'ot Dios.

Adán yic'ot Cristo

¹² Tsa' ochi mulil ti pañimil cha'an ti' mul juntiquil winic i c'aba' Adán. Jini mulil tsi' y_Λc'_Λ ti

ch_Λmel pejt_Λel winicob x'ixicob. Jini cha'an mi lac ch_Λmel ti lac pejt_Λel, come tsa' lac cha'le mulil ti lac pejt_Λel.

¹³ Che' maxto ts'ijbubilic jini mandar, anix mulil ti pañimil. Pero che' maxto anic mandar, maxto anic mulil ti' wenta winicob x'ixicob.

¹⁴ Melel tsa' laj ch_Λmiyob c'ΛΛΛ ti Adán c'ΛΛΛ ti Moisés, yic'ot ja'el jini mach b_Λ lajalobic i mul bajche' Adán. Jini Adán mach lajalic che' bajche' Cristo tsa' b_Λ tili ti wi'il.

¹⁵ Mach mejlic ti lajintel lac majtan yic'ot lac mul. Cha'an ti' mul juntiquil winic, Adán, cab_ΛΛ tsa' ch_Λmiyob. Pero tsa' utsi p'ojli i yutslel i pusic'al Dios yic'ot i majtan ti' tojlel cab_Λlob cha'an ti' yutslel i pusic'al juntiquil winic, jiñ_Λch Jesucristo.

¹⁶ Jini lac majtan mach lajalic bajche' jini wocol mu' b_Λ lac taj cha'an ti' mul Adán. Come cha'an ti jump'ejl mulil tsa' tejchi meloñel yic'ot tojmulil. Pero ti lac majtan jach mi laj q'uejlel ti toj anquese cab_ΛΛ lac mul.

¹⁷ Cha'an ti' mul jini juntiquil winic wersa mi' ch_Λmelob pejt_Λel winicob x'ixicob, pero cha'an ti' yutslel juntiquil, jiñ_Λch Jesucristo, cuxul mi' yajñelob jini mu' b_Λ i ch'Λmob ñuc b_Λ i yutslel i pusic'al Dios yic'ot toj b_Λ i pusic'al mu' b_Λ i y_Λq'uentelob ti' majtan jach. Che' jini mi caj i m_Λjlel i cha'añob.

¹⁸ Cha'an ti' mul Adán sajtemob pejt_Λel winicob x'ixicob, pero cha'an ti toj b_Λ i melbal Cristo mi' q'uejlelob ti toj pejt_Λel winicob x'ixicob, cha'an cuxul mi' yajñelob.

¹⁹ Come cab_Λlob tsa' q'uejliyob ti mulil cha'an tsi' ñusa mandar Adán. Che' ja'el cab_Λlob mi'

q'uejlelob ti toj cha'an tsi' jac'Λ mandar Cristo.

²⁰ Tsa' tili mandar ja'el cha'an mi' tsictiyel woli' p'ojlel lac mul, pero che' bΛ tsa' p'ojli mulil, ñumen cabΛl tsa' p'ojli i yutsllel i pusic'al Dios.

²¹ Tsiquil che' jini, tsa' chΛmiyob cabΛlob ti' yumΛntel mulil, pero cha'an ti' yutsllel i pusic'al Dios anix laj cuxtilel mach bΛ anic mi' jilel, cha'an tsa' aq'uentiyonla toj bΛ lac pusic'al ti Jesucristo lac Yum.

6

Chameñonixla ti' tojlel mulil, pero cuxulonla ti Cristo

¹ ¿Chuqui yom mi lac sub, che' jini? ¿Yom ba mi lac chΛn cha'len mulil cha'an mi' p'ojlel i yutsllel i pusic'al Dios?

² Mach yomic. Jilemix i p'ΛtΛlel mulil ti lac tojlel. ¿Bajche', che' jini, mi mejlel lac chΛn cha'len mulil?

³ ¿Mach ba la' wujilic? Pejtelonla tsa' bΛ ochiyonla ti Cristo Jesús che' bajche' ti ch'Λmja', tsa' chΛmiyonla yic'ot.

⁴ Che' bajche' ti ch'Λmja' tsa' tem mujquiyonla yic'ot Cristo che' bΛ tsa' chΛmi. Jini cha'an tsa' tejchi loq'uel Cristo ba'an chameño' bΛ cha'an ti' ñucllel lac Tat, cha'an mi lac cha'len xΛmbal ti tsiji' bΛ laj cuxtilel.

⁵ Come mi temel tsa' chΛmiyonla yic'ot Cristo che' bajche' tsa' chΛmi, che' ja'el temel mi lac tejchel ch'ojyel che' bajche' tsa' tejchi ch'ojyel.

⁶ Come la cujil tsa' ch'ijle ti cruz lac tsucul pusic'al yic'ot Cristo cha'an mi' jisΛntel i p'ΛtΛlel mulil ti lac pusic'al, cha'an ma'anix mi lac chΛn yuman mulil.

7 Come jini tsa'ix b Δ ch Δ mi, colbilix ti' p' Δ tlal mulil.

8 Mi tsa' ch Δ miyonla yic'ot Cristo, la cujil ja'el cuxul mi caj la cajñel yic'ot.

9 Come la cujil tejchemix ch'ojoyel Cristo, mach mejlix ti cha' ch Δ mel. Mach mejlix i cha' ts Δ ns Δ ntel.

10 Come che' b Δ tsa' ch Δ mi Jesús, jas Δ l jach junyajl tsa' ch Δ mi. Ma'anix mi' ch Δ n ch Δ mel cha'an i tojol mulil. Cuxul w Δ le cha'an mi' ñuq'uesan Dios.

11 Che' ja'el jatetla, ña'tanla jilemix i p' Δ tlal mulil ti la' tojlel, pero cuxuletla cha'an mi la' ñuq'uesan Dios ti Cristo Jesús.

12 Jini cha'an mach mi la' yuman mulil ti la' b Δ c'tal yujil b Δ ch Δ mel, ame la' jac'ben i colosojlel la' pusic'al.

13 Mach mi la' w Δ c' la' b Δ c'tal cha'an mi' cha'len jontolil. Aq'uen la' b Δ Dios, come tejchemetixla ch'ojoyel ti ch Δ mel cha'an mi' c' Δ jñel la' b Δ c'tal ti' melol chuqui toj cha'an mi la' ñuq'uesan Dios.

14 Come mach ch Δ n añetixla ti' p' Δ tlal mulil cha'an mi la' jac'. Mach añetixla ti' wenta jini mandar, come añetixla ti' yutslel i pusic'al Dios.

I winicob Dios mi' jac'ob chuqui toj

15 ¿Chuqui yom mi lac mel che' jini che' mach añonixla ti' wenta jini mandar, pero añonixla ti' yutslel i pusic'al Dios? ¿Yom ba mi lac ch Δ n cha'len mulil? Mach yomic.

16 ¿Mach ba la' wujilic? Che' mi la' wotsan la' b Δ ti' ye'tel ti' tojlel yamb Δ winic, i winiquetla che' woli la' jac'ben. Jini mu' b Δ i jac' mulil mi' ch Δ mel. Jini mu' b Δ i jac' Dios mi' taj toj b Δ i pusic'al.

17 Ti wajali chucbiletla ti' p'ʌtʌlel mulil. Wʌle wocolix i yʌʌ Dios, tsa'ix la' jac'ʌ ti jump'ejl la' pusic'al jini cʌntesa tsa' bʌ aq'uentiyetla tsa' bʌ la' ñopo.

18 Tsa'ix loc'sʌntiyetla ti mulil. Ochemetixla ti' winic Dios cha'an mi la' jac' chuqui toj.

19 Wocol mi la' ch'ʌmben isujm come wini-quetla. Jini cha'an mic cha'len t'an ti lajiya. Che' bajche' tsa' la' wʌc'ʌ la' bʌc'tal cha'an mi la' cha'len chuqui tac bibi' yic'ot chuqui tac jontol, che' yom mi la' wʌc' la' bʌc'tal wʌle cha'an mi la' jac' chuqui toj cha'an mi la' wochel ti ch'ujul.

20 Come che' chuculetla ti mulil, ma'anic la' p'ʌtʌlel cha'an mi la' jac' chuqui toj.

21 ¿Chuqui tsa' la' taja ti mulil, che' jini? Wʌle che' mi la' cha' ña'tan la' mul, mi la' cha'len quisin, come la' wujilix mi' chʌmelob jini mu' bʌ i cha'leñob mulil che' bajche' jini.

22 Wʌle loc'sʌbiletixla ti' p'ʌtʌlel mulil. I wini-quetixla Dios. Woli la' taj la' sʌq'uesʌntel yic'ot la' cuxtilel mach bʌ anic mi' jilel.

23 An i tojol mulil. Jini mu' bʌ i cha'leñob mulil wersa mi' chʌmelob, jiñʌch i tojol. Pero lac majtan ch'oyol bʌ ti Dios jiñʌch laj cuxtilel mach bʌ anic mi' jilel ti lac Yum Cristo Jesús.

7

Lajiya yic'ot x'ixic am bʌ i ñoxi'al

1 C pi'ʌlob mu' bʌ la' cʌn jini mandar, ¿mach ba la' wujilic che' añonla ti' wenta mandar, wersa mi lac jac' jini mandar che' cuxulon tola?

2 Come jini x'ixic am bʌ i ñoxi'al an ti' wenta cha'an mi' jac' jini mandar mu' bʌ i yʌl wersa mi'

yajñel yic'ot i ñoxi'al che' cuxul to. Mi tsa' chami i ñoxi'al, librejix. Ma'anix mi' chΛn jac' chuqui mi' yΛl jini mandar cha'an i ñoxi'al.

³ Jini cha'an mi tsi' pi'le yambΛ winic che' cuxul to i ñoxi'al, i ts'i'lelΛch, pero mi tsa'ix chΛmi i ñoxi'al, librejix. Ma'anix mi' jac' jini mandar. Che' jini, mach i ts'i'lelic jini x'ixic mi tsa' cha' ñujpuñi yic'ot yambΛ winic.

⁴ Che' ja'el quermanojob, jilemix i p'ΛtΛlel jini mandar ti la' tojlel come tsa' chΛmiyetla yic'ot Cristo cha'an mi la' loq'uel ti' wenta jini mandar, cha'an mi la' taj yambΛ la' yum. Jini lac Yum jiñΛch Cristo tsa' bΛ tejchi loq'uel ba'an chΛmeño' bΛ cha'an mi lac melben i ye'tel Dios.

⁵ Che' bΛ tsa' lac jac'be lac tsucul pusic'al, jini i colosojlel lac pusic'al, ñijcΛbil cha'an mandar, tsi' nijcayonla ti mulil cha'an mi' yΛc'onla ti chΛmel.

⁶ WΛle tsa'ix loq'uiyonla ti' wenta jini mandar. Tsa'ix chΛmiyonla quic'ot Cristo. Librejonixla cha'an ma'anix mi lac jac'ben jini tsa' bΛ i cΛchΛyonla. Jini cha'an mi lac jac'ben Dios ti' p'ΛtΛlel jini Espíritu ti tsiji' bΛ laj cuxtilel, mach ti' p'ΛtΛlelic jini ts'ijbubil bΛ mandar ba' cΛchΛlonla wajali.

Mulil am bΛ ti lac pusic'al

⁷ ¿Chuqui yom mi cΛl, che' jini? ¿Mulil ba jini mandar? Mach mulilic. Machic an mandar, ma'anic tsaj cΛñΛ mulil. Machic tsi' subu mandar: “Mach a tsΛjyuben i chubΛ'an a pi'Λlob”, ma'anic tsac ña'ta mulilΛch che' bΛ tsac tsΛjyube i chubΛ'an c pi'Λlob.

⁸ Jini mandar tsi' yΛq'ueyon j cΛn mach tojic i tsΛjyuntel chubΛ'añΛl, pero cha'an tic mul tsa' caji

c tsΛjyun. Che' ma'anic mandar ma'anic mi lac ña'tan lac jontolil.

⁹ Che' bΛ maxto anic tsa cubi mandar, tsac lon ña'ta cuxulon. Che' bΛ tsa cubi mandar, tsa' tejchi c jontolil. Tsac ña'ta chΛmeñon ti mulil.

¹⁰ Tsa' aq'uentiyon jini mandar cha'an mic taj j cuxtilel, pero tsi' yΛc'Λyon ti chΛmel cha'an c mul.

¹¹ Cha'an tic jontolil tsa' lotintiyon. Jini cha'an chΛmeñon ti mulil cha'an jini mandar.

¹² Ch'ujul jini mandar, che' jini. Ch'ujul i subal Dios. TojΛch. Uts'atΛch.

¹³ ¿Am ba i mul jini mandar cha'an tsi' yΛc'Λyon ti chΛmel? Ma'anic. JiñΛch mulil am bΛ tic pusic'al tsa' bΛ i chucuyon ti' p'ΛtΛlel cha'an mi' tsictiyel mulilΛch. Jini mulil tsi' c'ΛñΛ chuqui uts'at, jiñΛch mandar, cha'an mi' yΛc'on ti chΛmel, cha'an mi' tsictiyel c'ax jontol mulil.

¹⁴ La kujil tilem ti Espíritu jini mandar, pero winicon, tsucul c pusic'al. Chuculon ti' p'ΛtΛlel mulil.

¹⁵ Ma'anic mic ch'Λmben isujm jini mu' bΛ c mel. Come ma'anic mic mel chuqui com. Mu' jach c mel chuqui mic ts'a'len.

¹⁶ Che' mic mel jini mach bΛ comic c mel, mic ña'tan uts'atΛch jini mandar.

¹⁷ Mach tilemic tic pusic'al che' mic mel che' bajche' jini. JiñΛch mulil am bΛ tic pusic'al.

¹⁸ Che' jini kujil ma'anic chuqui wen tic pusic'al, come tsucul c pusic'al. Com c mel chuqui uts'at, pero mach mejlic c mel.

¹⁹ Ma'anic mic mel jini uts'at tac bΛ com bΛ c mel. Jini jontolil mach bΛ comic c mel jiñΛch mu' bΛ c mel.

20 Jini cha'an che' mic mel jini mach b_Λ comic c mel, mach joñonix wolic mel, jiñ_Λch mulil am b_Λ tic pusic'al.

21 Che' jini mic ña'tan an c p_Λyol ti mulil, come che' com c mel chuqui uts'at, an jontolil tic pusic'al.

22 Come tic pusic'al mic wen mulan i mandar Dios.

23 Pero mic ña'tan an yamb_Λ c p_Λyol tic b_Λc'tal mu' b_Λ i contrajin jini com b_Λ c mel tic pusic'al. Mi' y_Λc'on ti chujquel ti' p'_Λt_Λlel mulil am b_Λ tic b_Λc'tal.

24 P'ump'un jax c b_Λ. ¿Majqui mi caj i loc'sañon ti' p'_Λt_Λlel jini tsucul b_Λ c pusic'al mu' b_Λ i y_Λc'on ti ch_Λmel?

25 Wocolix i y_Λl_Λ Dios, Jesucristo lac Yum mi' y_Λc'on ti coel. Che' jini, joñon ti tsiji' b_Λ c pusic'al mic jac'ben i mandar Dios. Ti tsucul b_Λ c pusic'al mic jac'ben i p'_Λt_Λlel mulil.

8

Cuxulonla ti Espíritu

1 Jini cha'an ma'anix mi' y_Λjq'uelob ti tojmulil jini año' b_Λ ti Cristo Jesús.

2 Come i p'_Λt_Λlel jini Espíritu mu' b_Λ i y_Λq'ueñonla laj cuxt_Λlel ti Cristo Jesús tsi' coloyonla ti' p'_Λt_Λlel mulil mu' b_Λ i y_Λc'onla ti ch_Λmel.

3 Jini mandar ma'anic tsa' mejli i coltañonla, come c'uñonla cha'an lac tsucul pusic'al, pero tsa' mejli i coltañonla Dios che' b_Λ tsi' choco tilel i Yalobil cha'an mi' toj lac mul. I Yalobil Dios tsi' ch'_Λm_Λ i b_Λc'tal lajal bajche' lac cha'an am b_Λ i p_Λyol ti mulil. Tsi' y_Λc'_Λ i b_Λ ti ch_Λmel cha'an mi'

toj lac mul, cha'an mi' jilel i p'atlel mulil am b_Λ ti lac b_Λc'tal.

⁴ Tsa' ch_Λmi cha'an mi' y_Λq'ueñonla lac mel chuqui tac toj che' bajche' yom jini mandar. Jiñach mu' b_Λ lac mel che' mi lac cha'len x_Λmbal che' bajche' yom jini Espíritu, mach che'ic bajche' yom lac tsucul pusic'al.

⁵ Come jini mu' b_Λ i jac'beñob i tsucul pusic'al mi' ch_Λn ña'tañob chuqui yom i tsucul pusic'al. Jini mu' b_Λ i jac'beñob jini Espíritu mi' ch_Λn ña'tañob chuqui yom jini Espíritu.

⁶ Come jini mu' b_Λ i ch_Λn jac' i tsucul pusic'al mi' y_Λj_q'uel ti ch_Λmel. Jini mu' b_Λ i ch_Λn jac' jini Espíritu mi' y_Λq'uentel i cuxtalel yic'ot i ñ_Λch'tilel i pusic'al.

⁷ Jini cha'an jini mu' b_Λ i ch_Λn ña'tan chuqui yom i tsucul pusic'al woli' contrajin Dios. Ma'anic mi' jac'ben i mandar Dios. Mach mejlic i jac'ben.

⁸ Come jini mu' b_Λ i jac'ob i tsucul pusic'al mach mejlic i melob chuqui uts'at ti' wut Dios.

⁹ Jatetla mach ch_Λn añetixla ti' p'atlel la' tsucul pusic'al. Añetla ti' wenta Espíritu mi woli' yajñel i yEspíritu Dios ti la' pusic'al. Jini mach b_Λ anic i cha'an i yEspíritu Cristo, mach i cha'anic Dios.

¹⁰ Mi an Cristo ti la' pusic'al, anquese mi' ch_Λmel la' b_Λc'tal cha'an mulil, jini Espíritu mi' y_Λq'ueñetla la' cuxtalel cha'an tsa' q'uejliyetla ti toj.

¹¹ Mi ya' chumul ti jatetla i yEspíritu Dios tsa' b_Λ i teche ch'o_yjel Jesús, jini Dios tsa' b_Λ i teche ch'o_yjel Cristo Jesús mi caj i y_Λq'uen i cuxtalel la' b_Λc'tal cha'an ti' yEspíritu chumul b_Λ ti la' pusic'al.

¹² Actan che' jini hermanojob, an ti lac wenta cha'an mi lac jac'ben lac Yum, pero mach yomic

mi lac jac' lac tsucul pusic'al cha'an mi lac mel chuqui yom.

13 Mi woli la' mel bajche' yom la' tsucul pusic'al, wersa mi caj la' ch_Λmel. Pero mi ti' p'Λtlal Espiritu mi la' w_Λc' ti ch_Λmel i melbal la' tsucul pusic'al, cuxul mi caj la' wajñel.

14 Pejtelelob mu' b_Λ i toj'es_Λntelob majlel cha'an i yEspiritu Dios jiñob_Λch i yalobilob Dios.

15 Dios tsi' y_Λq'ueyetla i yEspiritu. Ma'anic tsi' yotsayetla ti mozo cha'an mi la' mel to'ol e'tel yic'ot b_Λq'uen. Mi' y_Λq'ueñetla la' ña'tan ochemetla ti' yalobilob Dios. Jini cha'an mi la' c_Λl: Papa, c Tat, cho'onla.

16 Jini Espiritu mi' subeñonla i yalobilonla Dios. Che'Λch mi' y_Λl lac pusic'al ja'el.

17 Mi i yalobilonla Dios, an chuqui mi caj la' c_Λq'uentel ti Dios. Mi tsa' la cubi wocol temel yic'ot Cristo, lac ten cha'an jach la quic'ot Cristo chuqui mi caj la' c_Λq'uentel, cha'an temel mi lac taj lac ñuclél yic'ot Cristo.

18 Mi c_Λl, mach mejlic ti lajintel jini wocol am b_Λ w_Λle yic'ot i ñuclél Cristo mu' b_Λ caj i tsictiyel ti joñonla.

19 Come pejtél melbil tac b_Λ ti pañimil woli ti pijt jinto mi' p_Λst_Λlob i yalobilob Dios.

20 Come tsa' asiya yic'ot wocol pejtél melbil tac b_Λ, mach cha'anic bajñel yom, pero che'Λch yom Dios cha'an mi' wersa pijtan jini ñumen uts'at tac b_Λ mu' b_Λ caj i tilel.

21 Pejtél jini melbil tac b_Λ mi caj i y_Λjq'uel ti colel ti' p'Λtlal ch_Λmel. Mi caj i yochel ti libre cha'an tijicña mi' yajñel yic'ot i ñuclél i yalobilob Dios.

22 Come la kujil temel woli ti ajacniyel pejtelel jini pañimil. Woli ti bajq'uel yilal c'ΛΛΛ wΛle.

23 Mach cojic jach jini melbil tac bΛ woli ti ajacniyel, pero joñonla ja'el. Tsa'ix aq'uentiyonla ñaxan bΛ lac majtan, jiñΛch jini Espíritu. Woliyonla ti ajacniyel ti lac pusic'al, come woliyonla ti pijt jinto mi' tsictiyel i yalobilonla Dios che' mi la cΛq'uentel tsiji' bΛ lac bΛc'tal.

24 Come che' bΛ tsa' coltΛntiyonla, tsa' caji lac pijtan. Mi tsa'ix laj q'uele jini woli bΛ lac pijtan, ma'anix woli lac chΛn pijtan. Ma'anic majch mi' chΛn pijtan jini woli bΛ i q'uel.

25 Mi woli lac pijtan jini mach bΛ laj q'ueleyic, la' lac pijtan ti' xuc'tilel lac pusic'al.

26 Che' ja'el jini Espíritu mi' coltañonla che' c'uñonla, come mach la kujilic bajche' yom mi lac pejcan Dios. Jini Espíritu mi' c'ajtiben Dios ti wocol t'an chuqui yom ti lac tojlel che' woliyonla ti ajcΛn.

27 Dios mu' bΛ i wen q'uel lac pusic'al yujil chuqui yom jini Espíritu, come mi' c'ajtiben Dios ti wocol t'an cha'an mi' coltan i cha'año' bΛ che' bajche' yom Dios.

Mi' wen mΛjlel lac cha'an

28 La kujil mi' c'Λn Dios pejtelel chuqui tac mi' yujtel cha'an i wenlel jini mu' bΛ i c'uxbiñob Dios, jini pΛybilo' bΛ i cha'an che' bajche' tsi' wΛn ña'ta.

29 Come Dios tsi' wΛn yajca i cha'año' bΛ. Tsi' wΛn wa'chocoyob cha'an mi' yΛq'uentelob i pusic'al lajal bajche' i pusic'al i Yalobil cha'an mi' taj cabΛ i yijts'iñob jini ascuñaΛ bΛ.

30 Dios tsi' p_Λγ_Λ ja'el jini w_Λn wa'chocobilo' b_Λ i cha'an. Tsi' yotsa jini p_Λγ_bilo' b_Λ i cha'an ti' wenta. Tsi' γ_Λq'ueyob i ñucl_Λl jini tsa' b_Λ i q'ueleyob ti toj.

31 ¿Chuqui yom mi lac sub, che' jini? Mi woli' coltañonla Dios, ¿majqui mi mejlel i contrajiñonla?

32 Dios ma'anic tsi' p'unta i Yalobil, pero tsi' γ_Λc'Λ ti ch_Λmel cha'añonla ti lac pejtelel. ¿Mach ba muq'uic i γ_Λq'ueñonla yic'ot Cristo pejtelel chuqui yom lac cha'an?

33 ¿Majqui mi mejlel i sub i mul jini γ_{aj}c_Λbilo' b_Λ i cha'an Dios? Ma'anic majqui. Jini mu' b_Λ i ñu_sΛbeñonla lac mul, mu' b_Λ i yotsañonla ti' wenta jiñ_Λch Dios.

34 Cristo Jesús tsa' ch_Λmi cha'añonla. Tsa' tejchi ch'o_jyel ba'an ch_Λmeño' b_Λ. An ti' ñoj Dios ba' woli' c'ajtiben Dios laj col_Λntel. Jini cha'an ma'anic majqui mi mejlel i γ_Λc'onla ti tojmulil.

35 ¿Am ba chuqui mi mejlel i m_Λc_tΛben i c'uxbiya Cristo ti lac tojlel? ¿Mejl ba lac wocol, mi laj c'ojo'ol, mi lac tic'l_Λntel, mi lac wi'ñal, mi che' ma'anic lac pislel, mi b_Λb_Λq'uen b_Λ, mi espada? Ma'anic.

36 Come ts'ijbubil: “Cha'añetla wolic ts_Λn_santel lojon ti pejtelel ora. Mic chujquel lojon che' ba-jche' tiñ_Λme' cha'an mic ts_Λn_santel lojon”, che'en.

37 Ti pejtelel ili wocol mi' wen m_Λjlel lac cha'an, cha'an ti' p'_Λt_Λlel Jesús tsa' b_Λ i c'uxbiyonla.

38-39 Come cujil ma'anic chuqui mi mejlel i m_Λc_tan i c'uxbiya Dios che' mi lac ch_Λmel o che' cuxulon tola, mi ángelob, mi yum_Λlob, mi jini p'_Λt_Λlo' b_Λ, mi jinic mu b_Λ i yujtel w_Λle, mi jinic mu' b_Λ caj ti ujtel, mi chan tac b_Λ, mi jinic am b_Λ ti yebal, mi yan tac b_Λ melbil tac b_Λ. Ma'anic chuqui

mi mejlel i mactan i c'uxbiya Dios mu' b Δ lac taj ti lac Yum Cristo Jesús.

9

Mu' b Δ i yajc Δ ntel ti Dios

¹ Mic sub chuqui isujm ti Cristo. Ma'anic mic cha'len lot. Che' Δ ch mi' subeñon c pusic'al c Δ ntes Δ bil b Δ cha'an jini Ch'ujul b Δ Espiritu.

² Wen ch'ijiyem c pusic'al. Cab Δ l mic cha'len pensar ti pejtelel ora.

³ Uts'at muq'uic c chojquel ti tojmulil cha'an mij coltan c pi' Δ lob, come c'ux mi cubiñob, come c pi' Δ l lojon c b Δ , junlajal c ñojte'el lojon.

⁴ Israelob Δ ch. Tsa' p Δ jiyob cha'an mi' yochelob ti' yalobil Dios. Tsa' tsictiyi i ñuel Dios ti' tojlelob. Tsi' yubiyob jini trato b Δ t'an. Tsa' aq'uentiyob jini mandar. Tsa' p Δ s Bentleyob bajche' yom mi' ch'ujutesañob Dios. Tsa' subentiyob chuqui mi' caj i y Δ q'uentelob.

⁵ Abraham yic'ot Isaac yic'ot Jacob jiñob Δ ch i ñojte'elob. I ñojte'elob Cristo ja'el. Jini cha'an i pi' Δ lob i b Δ yic'ot Cristo, come tsi'q'uele pañimil Cristo ti' tojlelob. Cristo jiñ Δ ch lac Dios am b Δ ti' wenta pejtelel chuqui tac an. La' subjic ti uts'at ti pejtelel ora. Amén.

⁶ Puru isujm i t'an Dios. Mach lolomic tsi' y Δ c' Δ i t'an, anquese mach i cha'añobic Dios pejtelel i p'olbal Israel.

⁷ Che' ja'el mach mero i yalobilob Abraham pejtelel i p'olbal Abraham. Come ts'ijbubil: "I p'olbal Isaac jiñob Δ ch a walobilob".

⁸ Tsiquil che' jini: Mach i yalobilobic Dios pejteteil i p'olbal Abraham. Jini jach i yalobilob Abraham tsa' b_Λ tiliyob cha'an ti' t'an Dios jiñob_Λch mero i yalobilob.

⁹ Come jiñ_Λch jini t'an tsa' b_Λ subenti Abraham: “Ti yamb_Λ jab cha' talon. Mi caj i y_Λc' ti pañimil ch'iton b_Λ i yalobil Sara”, che'en.

¹⁰ Mach cojic jach jini, pero Rebeca ja'el, che' b_Λ tsa' caji i c_Λnt_Λben i yalobil Isaac lac ñojte'el,

¹¹ che' c_Λnt_Λbilob to i yalobilob, che' maxto anic tsi' cha'leyob chuqui wen mi chuqui jontol, Dios tsi' sube Rebeca mi caj i yujtel che' bajche' tsi' w_Λn ña'ta Dios mu' b_Λ i yajcan majqui yom. Mach cha'anic wen b_Λ lac melbal mi' yajcañonla, pero cha'an yom i p_Λyonla.

¹² Jini cha'an tsa' subenti Rebeca: “Jini ascuña_Λ b_Λ, i c'aba' Esaú, mi caj i melben i ye'tel jini ijts'iñ_Λ b_Λ, i c'aba' Jacob”, che'en.

¹³ Come ts'ijbubil: “Tsaj c'uxbi Jacob, tsac ts'a'le Esaú”, che'en.

¹⁴ ¿Chuqui yom mi lac sub, che' jini? ¿Mach ba tojic Dios? Toj cu.

¹⁵ Come Dios tsi' sube Moisés: Mi caj c p'untan jini com b_Λ c p'untan. Mi caj c p_Λsben i yutslel c pusic'al jini com b_Λ c p_Λsben, che'en.

¹⁶ Tsiquil che' jini, Dios mi' p'untan jini yajc_Λbil b_Λ i cha'an, mach cha'anic che' yom i pusic'al winic, mi cha'anic woli' wersa sajcan i p'unt_Λntel. Mi' p'unt_Λntel cha'an che'_Λch yom Dios.

¹⁷ I Ts'ijbujel Dios mi' y_Λl chuqui tsa' subenti Faraón: “Tsac wa'chocoyet ti rey cha'an mic p_Λs c p'_Λt_Λlel ti a tojel, cha'an mi' pujquel j c'aba' ti pejteteil pañimil”, che'en Dios.

18 Tsiquil che' jini, Dios mi' p'untan majqui yom i p'untan. Mi' tsʌts'esʌben i pusic'al majqui yom i tsʌts'esʌben i pusic'al.

19 Jini cha'an mi caj a c'ajtibeñon: ¿Chucoch mi' chʌn ña'tan lac mul, che' jini? Come ¿majqui mi mejlel i tic' chuqui yom Dios? che'et.

20 ¿Chucoch che'i ma' cha'len t'an? ¿Majquiyet mu' bʌ a letsan a t'an ti' contra Dios? Jini melbil tac bʌ, ¿yom ba mi' suben xmeloñel: ¿Chucoch che' tsa' meleyon?

21 Jini xmel uc'um, ¿mach ba mejlic i c'ʌn jini oc'ol bajche' yom? Ti junc'ojl oc'ol mi' mel jump'ejl uc'um mu' bʌ i c'ʌjñel cha'an chuqui uts'at. Mi' mel yambʌ uc'um mu'bʌ i c'ʌjñel cha'an jini mach bʌ wenic.

22 ¿Chuqui che' jini? Anquese yom Dios i pʌs i mich'ajel yic'ot i p'ʌtʌlel, wen jal tsi' cuchbeyob i mul jini tsa' bʌ i techbeyob i mich'ajel mu' bʌ caj i jisʌntelob.

23 Wen jal tsi' cuchbeyob i mul cha'an mi' yʌc' ti tsictiyel pejtelel i ñucllel ti' tojlel jini p'untʌbilo' bʌ i cha'an, yajcʌbilo' bʌ cha'an mi' tajob i ñucllel.

24 I pi'ʌlonla come pʌybilonla i cha'an ja'el. Mach jinic jach israelob pʌybilob, pero jini gentilob ja'el.

25 Che' ja'el tsi' yʌʌ ti' jun Oseas: “Mi caj c pejcañob tic cha'an jini mach bʌ c cha'añobic ti yambʌ ora. Mi caj c pejcan ti c'uxbibil bʌ c cha'an jini mach bʌ c'uxbibilic ti yambʌ ora.

26 Mi caj i yujtel ya' ba' tsa' subentiyob mach i cha'añobic Dios, ya'i mi caj i pejcʌntelob ti' yalobil jini cuxul bʌ Dios”, che'en.

27 Isaías ja'el tsi' yʌʌ cha'an Israelob: “Anquese lajal ti' tsicol i yalobilob Israel bajche' i ji'il colem

ñajb, lamital jach mi caj i colt Δ ntelob.

²⁸ Ti ora jach lac Yum mi caj i junyajlel cha'len meloñel ti pejtelel pañimil”, che'en.

²⁹ Che' bajche' tsi' w Δ n al Δ Isaías: “Machic tsi' c Δ ybeyonla la calobilob jini lac Yum, jiñ Δ ch i Yum cab Δ lob, lajal tsa' jis Δ ntiyonla bajche' jini año' b Δ ti Sodoma yic'ot ti Gomorra”, che'en.

Aq'uebilob toj b Δ i pusic'al cha'an tsi' ñopoyob

³⁰ ¿Chuqui yom mi lac sub, che' jini? Jini gentilob mach b Δ anic tsi' s Δ c Δ layob toj b Δ i pusic'al tsa' aq'uentiyob. Jiñ Δ ch toj b Δ i pusic'al aq'uebilob cha'an tsi' ñopoyob.

³¹ Pero jini israelob tsa' b Δ i ñopo i tajob toj b Δ i pusic'al cha'an ti' jac'ol mandar ma'anic tsa' mejli i jac'ob jini mandar ti ts' Δ c Δ .

³² ¿Chucoch? Come tsi' s Δ c Δ layob toj b Δ i pusic'al cha'an ti' jac'ol mandar. Ma'anic tsi' s Δ c Δ layob toj b Δ i pusic'al mu' b Δ i y Δ q'uentelob jini mu' b Δ i ñopob. Tsa' yajliyob ti jini xajlel ba' mi' jats'ob i yoc.

³³ Che' bajche' ts'ijbubil: “Awilan, mi c Δ c' ti Sion jump'ejl Xajlel ba' mi' jats'ob i yoc winicob, jump'ejl Xajlel mu' b Δ i y Δ c'ob ti yajlel. Jini mu' b Δ i ñop jini Xajlel ma'anic mi caj i yubin quisin”, che'en.

10

¹ Quermanojob, mij c'ajtiben Dios ti oración cha'an mi' colt Δ ntelob israelob. Jiñ Δ ch com b Δ ti pejtelel c pusic'al.

² Come mic sub ti isujm, anquese ch'ejlob cha'an Dios, mach yujilobic chuqui yom Dios.

³ Come mach yujilobic bajche' mi lac taj toj b Δ lac pusic'al ti Dios. Jini cha'an woli' ñopob

i bajñel wa'chocoñob i bΛ ti toj. Ma'anic tsi' peq'uesayob i bΛ cha'an mi' ch'Λmob ti' wenta i coltΛntel chajpΛbil bΛ i cha'an Dios.

⁴ Come ti Cristo tsa' ts'Λctiyi i c'Λjñibal mandar, come mi' yΛq'uentel toj bΛ i pusic'al majqui jach mi' ñop.

⁵ Moisés tsi' yΛΛ bajche' mi' tajob toj bΛ i pusic'al cha'an ti' jac'ol jini mandar. Tsi' yΛΛ: “Jini winic mu' bΛ i jac' ti ts'ΛcΛl jini mandar cuxul mi caj i yajñel”, che'en.

⁶ Pero yambΛyΛch i sujmllel jini toj bΛ lac pusic'al mu' bΛ la cΛq'uentel che' mi lac ñop. Mi' yΛ: Mach a wΛl ti a pusic'al: “¿Majqui mi caj i letsel majlel ti panchan?” (cha'an mi' pΛy jubel Cristo).

⁷ Mach a wΛl: “¿Majqui mi caj i jubel ochel ti' yajñib chΛmeño' bΛ?” (cha'an mi' pΛy loq'uel Cristo ba'an chΛmeño' bΛ).

⁸ Pero mi' yΛ: “LΛc'Λl an jini t'an ba' añet. An ti a wej, an ti a pusic'al ja'el”. Jiñach jini wen t'an mu' bΛ lac sub cha'an mi la' ñop.

⁹ Mi tsa' subu ti a wej a YumΛch Jesús, mi tsa' ñopo ti a pusic'al tsa'ix i teche loq'uel Dios ba'an chΛmeño' bΛ, mi caj a coltΛntel.

¹⁰ Come ti lac pusic'al mi lac ñop. Che' jini, mi la cΛq'uentel toj bΛ lac pusic'al. Ti la quej mi lac sub che' ñopol lac cha'an. Che' jini, mi laj coltΛntel.

¹¹ Come i Ts'ijbujel Dios mi' yΛ: “Jini mu' bΛ i ñop lac Yum Jesús ma'anic mi caj i yubin quisin”, che'en.

¹² Come junlajalobΛch judíojob yic'ot griegojob come juntiquil jach lac Yum. Jiñach i Yum pejtelel winicob. Mi yΛq'ueñob i yutsllel i pusic'al pejtelel mu' bΛ i pejcañob.

13 Come majqui jach mi' pejcan lac Yum ti' c'aba' mi taj i colt'antel.

14 ¿Bajche' mi mejlel i pejcañob lac Yum winicob x'ixicob che' maxto anic tsi' ñopoyob? ¿Bajche' mi mejlel i ñopob lac Yum che' max to anic tsi' yubibe-yob i t'an? ¿Bajche' mi mejlel i yubiñob mi ma'anic majqui mi' subeñob?

15 ¿Bajche' mi mejlel i cha'leñob subt'an mi mach chocbilobic majlel? Come ts'ijbubil: “¡Wen i t'ojol jax i yoc jini mu' b_Λ i subob jini wen t'an mu' b_Λ i y_Λq'ueñonla i ñ_Λch'tilel lac pusic'al!” che'en.

16 Mach ti pejtelobic tsi' jac'ayob jini wen t'an, come Isaías tsi' y_ΛΛ: “C Yum, ¿majqui tsi' ñopo jini tsa' b_Λ c subeyob lojon?” che'en.

17 Mi lac ñop chuqui mi la cubin. Mi la cubin i t'an Cristo che' mi lac subentel.

18 Mij c'ajtibeñetla: ¿Mach ba tsa'ic i yubiyob? Tsa' cu. Tsa' pam pujqui i t'an ti pejtelel pañimil. C'Λ_Λ ba' jax_Λ i lum tsa' pam pujqui i t'añob.

19 Mic cha' c'ajtibeñetla: ¿Mach ba anic tsi' ch'ambeyob isujm jini israelob? Ñaxan Moisés tsi' subu jini tsa' b_Λ i y_ΛΛ Dios: “Mi caj j coltan yaño' b_Λ mach b_Λ c cha'añobic cha'an mic techbeñetla ts_Λyts_Λyña b_Λ la' pusic'al. Mi caj j coltan jini mach b_Λ añobic i ña't_Λbal cha'an mic techbeñetla la' mich'ajel”. Che' tsi' y_ΛΛ Dios, che'en Moisés.

20 Ch'ejl i pusic'al Isaías tsi' subu i t'an Dios ja'el. Tsi' y_ΛΛ: “Tsa' tajleyon cha'an winicob x'ixicob mach b_Λ anic tsi' sajcayoñob. Tsa c_Λc'Λ c b_Λ ti c_Λjñel cha'an jini mach b_Λ anic tsi' ña'tayob i c_Λñon”, che'en Dios.

21 Pero cha'an israelob tsi' y_ΛΛ: “Ti pejtelel q'uin

wolic p_Λyob tij c'Λb winicob x'ixicob mach b_Λ yu-
jilobic i jac'ol. Mi' contrajinob c t'an", che'en.

11

A ñob to Israelob yajc_Λbilo' b_Λ i cha'an Dios

¹ Mij c'ajtibeñetla, che' jini: ¿Tsa' ba chojquiyob ti Dios jini winicob x'ixicob i cha'año' b_Λ Dios? Ma'anic. Come joñon i p'olbalon Israel ja'el, i p'olbalon Abraham, i p'olbalon Benjamín.

² Dios ma'anic tsi' c_Λy_Λ i winicob tsa' b_Λ i w_Λn c_Λñ_Λyob. ¿Mach ba la' wujilic chuqui tsi' y_ΛΛ i Ts'ijbujel Dios cha'an Elías? Tsi' c'ajtibe Dios ti wocol t'an cha'an mi' contrajin israelob.

³ Tsi' y_ΛΛ: “C Yum, tsa'ix i ts_Λnsayob x'alt'añoob a cha'an. Tsa'ix i jemeyob i yajñib tac ba' ma' w_Λq'uentel a majtan. C bajñel jax tsa' c_Λleyon. Yom i ts_Λnsaññoob”, che'en Elías.

⁴ ¿Bajche' tsi' jac'be Dios? Tsi' y_ΛΛ: “Wolij c_Λntan ojlil i wax_Λclujumbajc' (7000) winicob mach b_Λ anic tsi' ñocchocoyob i b_Λ ba'an Baal”, che'en.

⁵ Che' ja'el c'Λ_Λ w_Λle añoob to israelob yajc_Λbilo' b_Λ i cha'an Dios ti' yutslal i pusic'al.

⁶ Dios tsi' yajcayob ti' yutslal i pusic'al, mach cha'anic wen b_Λ i melbalob. Tsa'ic i yajcayob cha'an wen b_Λ i melbalob, jiñach i tojol i ye'tel, mach i majtanic.

⁷ Ña'tan, che' jini, jini israelob ma'anic tsi' tajayob chuqui tsi' sajayob. Jini yajc_Λbilo' b_Λ tsi' tajayob. Tsa' tsats'es_Λbentiyob i pusic'al yaño' b_Λ.

⁸ Che' bajche' ts'ijbubil: “Dios tsi' yotsayob ti tonto c'Λ_Λ w_Λle, cha'an ma'anic mi' c'otelob i

wut, cha'an ma'anic mi' yubiñob t'an ti' chiquin", che'en.

⁹ David ja'el tsi' y_ΛΛ: "La' p_Λntiyic ti yac yilal jini wen tac b_Λ i cha'añob cha'an mi' chujquelob, cha'an mi' yajlelob, cha'an mi' tajob i q'uexol i mul.

¹⁰ La' yajpic i wut cha'an ma'anic mi' c'otel. C'uchchocobeñob i pat ti pejtelel ora", che'en.

Tsi' tajayob i colt_Λntel gentilob

¹¹ Mij c'ajtibeñetla, che' jini. ¿Tsa' ba i jats'Λyob i yoc cha'an mi' junyajlel yajlelob? Ma'anic. Pero cha'an tsi' jats'Λyob i yoc israelob tsi' tajayob i colt_Λntel gentilob. Jini cha'an tsa' techbentiyob ts_Λyts_Λyña jax b_Λ i pusic'al israelob cha'an tsa' colt_Λntiyob gentilob, come yomob i colt_Λntel ja'el.

¹² Mi tsi' tajayob chuqui wen pejtelel año' b_Λ ti pañimil cha'an tsi' jats'Λyob i yoc israelob, mi tsi' tajayob chuqui wen jini gentilob ja'el cha'an tsi' s_Λt_Λyob chuqui wen jini israelob, c'ax cab_Λl mi caj i tajob chuqui wen che' mi' cha' ochelob.

¹³ Mic pejcañetla gentilet b_Λ la, come chocbilon majlel ti subt'an ti' tojlel gentilob. Mic ña'tan wen ñuc que'tel.

¹⁴ Come ti pejtelel c pusic'al com c techbeñob ts_Λyts_Λyña b_Λ i pusic'al c pi'Λlob cha'an mij coltan lamital cha'an mi' tajob i wenlel ti Dios.

¹⁵ Mi cab_Λl tsi' tajayob i colt_Λntel ti Dios jini gentilob che' b_Λ tsi' t_Λts'Λyob i b_Λ jini israelob, ¿chuqui mi caj i yujtel che' mi' cha' melob i b_Λ yic'ot Dios jini israelob? Mi caj i cha' cuxt_Λyelob jini ch_Λmeño' b_Λ.

16 Come jini Abraham yic'ot jini x'alt'anob, i cha'añob^Λch Dios. Che' ja'el i p'olbalob, come mi ch'ujul i wi' te', che' ja'el i c'Λb tac.

17 Tsa' jajqui loq'uel lamital i c'Λb te'. Jatet i c'Λbet yamb^Λ olivo te' mach b^Λ anic i c'Λjñibal, yilol jach b^Λ tsa' coli ti mate'el. Tsa' ots^Δtiyet ba' tsa' jajqui loq'uel i c'Λb. Tsa' taja a p'^Δtlal ti' wi' yic'ot ti' yetsel jini wen b^Λ olivo te'.

18 Mach a sub a b^Λ ti ñuc ti' contra i c'Λb te' tsa' b^Λ jajqui loq'uel. Mi tsa' subu a b^Λ ti ñuc, ña'tan ma'anic wola' w^Λq'uen i p'^Δtlal i wi' tac jini te'. Jini i wi' tac mi' y^Δq'ueñet a p'^Δtlal.

19 Mi caj a w^Δ: Tsa' jajqui loq'uel lamital i c'Λb tac cha'an mi mejlel cots^Δtel, che'et.

20 Melel^Λch. Tsa' jajqui loq'uel come ma'anic tsi' ñopoyob. Jatet ma' c^Λytal ba' ochemet cha'an jach tsa' ñopo. Mach a q'uel a b^Λ ti ñuc. Cha'len b^Λq'uen.

21 Dios tsi' jac^Λ loq'uel lamital jini mero i c'Λb te'. Mach to'o che'ic jach tsi' q'uele. Mach to'o che'ic jach mi caj i q'uelet ja'el.

22 Ña'tan, che' jini, i yutslal i pusic'al Dios yic'ot i mich'ajel. Ña'tan i mich'ajel ti' tojlel jini tsa' b^Λ yajliyob. Ña'tan i yutslal i pusic'al ti a tojlel mi xuc'ul ma' wajñel ti' yutslal i pusic'al. Machic jini, jatet ja'el mi caj a tsejpel loq'uel.

23 Jini tsa' b^Λ jajqui loq'uel mi caj i cha' ots^Δtelob mi tsi' sutq'uiyob i b^Λ cha'an mi' ñopob Dios, come Dios mi mejlel i cha' otsañob.

24 Jatetla tsa' ots^Δtiyetla ti jini wen b^Λ olivo te' anquese tsa' tsejpiyetla loq'uel ti juntejc olivo te' mach b^Λ anic i c'Λjñibal, yilol jach b^Λ tsa' coli ti mate'el. Mi tsa' mejliyetla ti ochel che' mach i

c'Λbeticla, isujm mi mejlel ti cha' ochel jini mero i c'Λb olivo te' tsa' bΛ jajqui tac loq'uel.

Mi caj i coltΛntelob Israelob

²⁵ Hermanojob, yom mi la' ña'tan jini t'an mach bΛ tsictiyemic ti yambΛ ora, ame ñuquic mi la' lon q'uel la' bΛ ti la' bajñel pusic'al. Tsa' tsΛtsayob i pusic'al lamital israelob jinto ts'ΛcΛl mi' yochelob jini gentilob.

²⁶ Che' jini, pejtelel israelob mi caj i coltΛntelob che' bajche' ts'ijbubil: “Tal juntiquil xColtaya loq'uem bΛ ti Sion. Mi caj i jisΛben i jontolil i p'olbal Jacob.

²⁷ JiñΛch xuc'ul bΛ c t'an tsa' bΛ c subeyob mu' bΛ caj i ts'actiyel che' mic loc'sΛbeñob i mul”, che'en Dios.

²⁸ WΛle jini israelob woli' contrajiñob Dios cha'an jini wen t'an cha'an mi' tajob i coltΛntel jini gentilob, pero c'uxbibilob ti Dios, come i p'olbalob Jacob.

²⁹ Dios ma'anic mi' q'uextan i pusic'al che' mi' yΛq'ueñonla lac majtan. Ma'anic mi' q'uextan i pusic'al che' mi' pΛyonla.

³⁰ Ti yambΛ ora jatetla ja'el tsa' la' ñusa Dios. WΛle tsa'ix p'untΛntiyetla cha'an ma'anic tsi' ñopoyob israelob.

³¹ Pero wΛle jini israelob tsa' bΛ i ñusayob Dios mi mejlel i cha' p'untΛntelob che' bajche' tsa' p'untΛntiyetla.

³² Dios tsi' cΛyΛyob ti mulil pejtel winicob x'ixicob cha'an mi' pΛsbeñob i yutslel i pusic'al ti pejtelelob.

33 Wen cabal i yutslel i pusic'al Dios. Ma'anic i p'isol i ña'tabal yic'ot i pusic'al. Mach mejlic laj camben i ña'tabal. Mach mejlic lac ch'amben isujm jini mu' b^Λ i mel.

34 ¿Am ba majch tsi' camben i pusic'al Dios? ¿Am ba majch tsi' antesa?

35 ¿Am ba majch tsi' yaq'ue Dios i majtan cha'an mi' cha' ch'amben i q'uejol?

36 Come ch'oyol ti Dios pejtelel chuqui tac an. Ti pejtelel cantabil i cha'an Dios. I cha'añach Dios ti pejtelel. La' subjic i ñuel Dios ti pejtelel ora. Amén.

12

La' la calq'uen lac b^Λ Dios

1 Jini cha'an hermanojob, a wolic mic subeñetla cha'an tsi' p'untayetla Dios, aq'uenla Dios la' bac'tal che' bajche' tsansabil b^Λ i majtan Dios anquese cuxulet to la. Jiñach ch'ujul b^Λ i majtan Dios, uts'at b^Λ mi' q'uel. Jiñach i ch'ujutesantel Dios ti isujm.

2 Mach mi la' mel bajche' mi' melob jini año' b^Λ ti pañimil. La' q'uextiyic la' pusic'al ti tsijib cha'an mi la' can chuqui yom Dios. Jiñach wen tac b^Λ yic'ot ts'acal tac b^Λ mu' b^Λ i mulan.

3 Ti' yutslel i pusic'al Dios tsa' b^Λ aq'uentiyon, mic subeñetla ti jujuntiquiletla: Mach a lon ña'tan ti a pusic'al ñumen an a ñuel bajche' an. Ti' p'isol jach bajche' tsi' yaq'ueyet a ñop Dios, ña'tan ti toj a ñuel ti jujuntiquiletla.

4 Ti lac bac'tal an cabal chucbil tac b^Λ. Mach junchajpic jach i c'ajñibal jini chucbil tac b^Λ.

⁵ Che' ja'el joñonla anquese cablonla, jump'ejl jach lac bΛc'tal ti Cristo. Lac tem cha'añΛch lac bΛ.

⁶ Mach junchajpic jach laj c'Λjñibal tsa' bΛ aq'uentiyonla ti' yutslel i pusic'al. Mi an laj c'Λjñibal cha'an mi lac sub t'an, la' lac sub ti pejtelel lac pusic'al che' bajche' tsi' yΛq'ueyonla lac ñop Dios.

⁷ Mi cha'añΛch mi laj coltan lac pi'Λlob, la' laj coltañob. Jini yujil bΛ cΛntesa, la' i cha'len cΛntesa.

⁸ Jini mu' bΛ i ñuq'uesΛben i pusic'al i pi'Λlob, la' i ñuq'uesΛbeñob. Jini mu' bΛ i yΛc' i chubΛ'an la' i yΛc' ti pejtelel i pusic'al. Jini am bΛ i ye'tel la' i wen mel i ye'tel. Jini mu' bΛ i cha'len p'untaya la' i cha'len ti' tijicñΛyel i pusic'al.

C'uxbiya

⁹ Cha'lenla c'uxbiya ti isujm. Ts'a'lenla jontolil. Mach mi la' cΛy i melol chuqui tac wen.

¹⁰ C'uxbin la' bΛ come la' pi'Λl la' bΛ, i yijts'iñetla Cristo. Yom ñumen ñuc mi la' q'uel la' pi'Λlob bajche' mi la' bajñel q'uel la' bΛ.

¹¹ Mach yomic ts'ubetla. Yom ch'ejletla ti jini Espíritu. Cha'lenla i ye'tel lac Yum.

¹² Yom tijicñayetla ti la' pijtaya. Yom xuc'uletla ti la' wocol. Pejcanla Dios ti pejtelel ora.

¹³ Coltanla i cha'año' bΛ Dios ti pejtelel chuqui tac anto yom i cha'añob. We'sañob ti la' wotot.

¹⁴ Aq'ueñob i yutslel la' t'an jini mu' bΛ i tic'lañetla. Ac'Λla i yutslel la' t'an, mach mi la' cha'len p'ajoñel.

¹⁵ Yom tijicñayetla yic'ot jini tijicñayo' bΛ. Cha'lenla uq'uel yic'ot jini mu' bΛ i cha'leñob uq'uel.

16 Ajñenla ti jump'ejl la' pusic'al yic'ot la' pi'lob. Mach mi la' q'uel la' b_Λ ti ñuc. Ajñenla yic'ot jini utso' b_Λ. Mach mi la' lon ña'tan cab_Λ la' bajñel pusic'al.

17 Mach mi la' q'uextan jontolil. Ña'tan la' mel chuqui toj ti' wut pejtelel winicob x'ixicob.

18 Cha'lenla wersa cha'an ñ_Λch'_Λl mi la' wajñel yic'ot pejtelel winicob x'ixicob.

19 C'uxbibilet b_Λ la, mach mi la' bajñel q'uext_Λben jontol b_Λ i melbal la' pi'lob. La' i q'uext_Λbeñob Dios ti' mich'ajel. Come ts'ijbubil: "Joñon mij q'uextan jontolil. Joñon mi c_Λq'ueñob i tojol i mul", che'en lac Yum.

20 Jini cha'an m_Λc'lan la' contra mi an i wi'ñal. Aq'uen chuqui mi' jap mi an i tiquin ti'. Che'_Λch mi caj a wen techben i quisin.

21 Mach a w_Λc' a b_Λ ti' jac'ol jontolil. Mele chuqui wen cha'an mi' m_Λjlel a cha'an.

13

Jac'benla año' b_Λ i ye'tel

1 Ti pejteleletla jac'benla i t'an jini año' b_Λ i ye'tel ti pañimil, come ch'oyol_Λch jini e'tel ti Dios. Dios tsi' wa'choco jini año' b_Λ i ye'tel.

2 Jini cha'an, jini mu' b_Λ i ñ_us_Λbeñob i t'an año' b_Λ i ye'tel, mi' ñ_usan jini wa'chocobilo' b_Λ i cha'an Dios. Jini mu' b_Λ i ñ_usañob t'an mi caj i tojob i mul.

3 Jini mu' b_Λ i cha'len chuqui wen ma'anic mi' cajel ti b_Λq'uen ti' tojlel año' b_Λ i ye'tel, jini jach mu' b_Λ i cha'len jontolil. Mi mach a womic mi' tejchel a b_Λq'uen ti' tojlel am b_Λ i ye'tel ch_Λn mele chuqui wen. Che' jini, uts'at mi caj i q'uelet.

4 Come jini am b_Λ i ye'tel i winic_Λch Dios cha'an mi' c_Λntañet. Mi wola' mel jontolil, cha'len b_Λq'uen come mach lolomic jach an i yespada. An i ye'tel, aq'uebil b_Λ i cha'an Dios, cha'an mi y_Λq'uen i toj i mul jini mu' b_Λ i cha'len jontolil.

5 Jini cha'an yom mi lac jac'ben i mandar, mach cojic jach cha'an mach mi' tajonla i mich'ajel Dios, pero cha'an ma'anic mi' cajel ti t'an lac pusic'al.

6 Jini cha'an mi la' w_Λc' tojoñel ja'el come jini año' b_Λ i ye'tel, i winicob_Λch Dios che mi' ch_Λn melob jini e'tel.

7 Aq'ueñob ti pejtelelob chuqui an ti la' wenta. Aq'uenla tojoñel ti chajp ti chajp jini mu' b_Λ i ch'Λmob tojoñel. B_Λc'ñanla jini yom b_Λ mi la' b_Λc'ñan. Q'uelela ti ñuc jini yom b_Λ mi la' q'uel ti ñuc.

Yom c'uxbiya come l_Λc'Λlix i yorajlel

8 Tojo la' bet ti pejtelel. Pero an yamb_Λ junchajp b_Λ la' bet cha'an mi la' ch_Λn c'uxbin la' b_Λ, come jini mu' b_Λ i c'uxbin i pi'Λlob ts'Λc_Λl mi' jac' jini mandar.

9 Come mi' y_Λl jini mandar: “Mach a cha'len ts'i'lel, mach a cha'len ts_Λnsa, mach a cha'len xujch', mach a ts_Λjyun chub_Λ'an_Λl”, che'en. Jini mandar tac yic'ot pejtelel yan tac b_Λ mandar mi' ts'actiyel che' mi lac jac' ili jump'ejl mandar: “C'uxbin a pi'Λlob che' bajche' ma' bajñel c'uxbin a b_Λ”.

10 Jini mu' b_Λ i c'uxbin i pi'Λlob ma'anic chuqui mi' cha'len ti' contrajob. Jini cha'an che' mi lac cha'len c'uxbiya ts'Λc_Λl mi lac jac' jini mandar.

11 Melela jini. Come la' wujil i yorajlelix w_Λle. Yomix mi lac ch'oysel ti w_Λyel come c'ax l_Λc'Λlix laj col_Λntel come anix ora tsa' caji lac ñop.

12 Yomax ñumel jini ac'alel. Talix jini q'uin. La' laj cAy i ye'tel ic'yoch'an bΛ pañimil. La' lac lApben i sAclel pañimil i wenta lac mActijib.

13 La' lac cha'len xAmbal ti uts'at che' bajche' ti q'uiñil. Mach yomic leco bΛ q'uiñijel, mi yAc'ajel, mi ts'i'lel, mi jontolil, mi leto. Mach yomic tsAytsAyña bΛ lac pusic'al cha'an i wenlel lac pi'lob.

14 C'ajtibenla lac Yum Jesucristo cha'an uts'at mi la' wajñel. Mach yomic mi la' chAn ña'tan chuqui yom la' tsucul pusic'al cha'an mi la' jac'ben i colosojlel.

14

Jini mach bΛ wolic i ñop ti pejtelel i pusic'al

1 Jini mach bΛ wolic i ñop ti pejtelel i pusic'al pAyAla ochel ti la' wotot. Mach mi la' pAy ochel cha'an mi la' cAlAx pejcan la' bΛ cha'an chuqui woli la' bajñel ña'tan ti la' pusic'al.

2 Juntiquil winic mi' ña'tan uts'at mi laj c'ux pejtelel chuqui an. YambΛ maxto bΛ cAntesAbilic mi' lon ñop an tic'bil tac bΛ i bAl ñAc'Al.

3 Jini mu' bΛ i c'ux pejtelel chuqui an, mach i ts'a'len jini mach bΛ anic mi' c'ux. Jini mach bΛ anic mi' c'ux mach mi' lon al ti' pusic'al an i mul jini mu' bΛ i c'ux, come ochem ti Dios.

4 ¿A wenta ba cha'an ma' melben i winic yambΛ yumAl? I wentajach i yum cha'an mi' q'uel mi xuc'ul o mi mach xuc'ulic. Lac Yum mi caj i q'uel ti xuc'ul i winic come an i p'Atalel lac Yum cha'an mi' xuc'chocon.

5 An winic ñumen ñuc bΛ mi' q'uel jump'ejl q'uin bajche' yambΛ. YambΛ winic junlajal mi' q'uel

pejtelel q'uin. Ti jujuntiquil la' i ña'tan ti jump'ejl i pusic'al bajche' yom.

⁶ Jini mu' b_Λ i mel q'uin mi' mel q'uin cha'an mi' ñuq'uesan lac Yum. Jini mach b_Λ anic mi' mel q'uin mi' nuq'uesan lac Yum ja'el che' ma'anic mi' mel q'uin. Jini mu' b_Λ i cha'len we'el mi' cha'len we'el cha'an mi' ñuq'uesan lac Yum. Mi' suben Dios wocolix i y_{ΛΛ}. Jini mach b_Λ anic mi' cha'len we'el mi' ñuq'uesan lac Yum che' ma'anic mi' cha'len we'el. Mi' suben Dios wocolix i y_{ΛΛ}.

⁷ Ma'anic majch cuxul cha'an i bajñel jach yom. Ma'anic majch mi' ch_Λmel cha'an i bajñel jach yom.

⁸ Mi cuxulonla, cuxulonla cha'an mi' q'uejlel ti ñuc lac Yum. Mi woli lac ch_Λmel, woli lac ch_Λmel cha'an mi' q'uejlel ti ñuc lac Yum. Jini cha'an mi cuxulonla, o mi woli lac ch_Λmel, i cha'añonla lac Yum.

⁹ Tsa' ch_Λmi Cristo, tsa' cha' ch'ojoyi. Cuxul tsa' cha' ajni cha'an mi' yochel ti' yum jini ch_Λmeñ'o' b_Λ yic'ot jini cuxulo' b_Λ.

¹⁰ Jatet ¿chucoch wola' q'uel ti xmulil a wermano? Come ti lac pejtelel mi caj lac wa't_Λl ba' mi' melonla Dios.

¹¹ Come ts'ijbubil: “Cha'an tic bajñel p'_Λtalel, che'en lac Yum, ti pejtelel winicob x'ixicob mi caj i ñocchocoñob i b_Λ tic tojel. Ti pejtelelob mi caj i subob i ñuclcl Dios”, che'en.

¹² Jini cha'an ti jujuntiquilonla mi caj lac sub lac b_Λ ti' tojel Dios.

¹³ Che' jini, mach yomix mi lac ch_Λn q'uel ti xmulil lac pi'_Λlob. La' laj q'uel lac b_Λ cha'an ma'anic mi lac y_Λsan ti mulil lac pi'_Λlob.

14 Ma'anic chuqui bibi' ti' bajñelil. Cujil, come tsa' p_{AS}bentiyon ti lac Yum Jesús. Bibi' jach ti' wut jini winic mu' b_Λ i q'uel ti bibi'.

15 Mi wola' techben i ch'ijiyemlel i pusic'al a wermano cha'an chuqui tac ma' c'ux, ma'anic wola' c'uxbin bajche yom. Tsa' ch_Λmi Cristo cha'an a wermano. Mach a w_{ΛC}' ti jilel cha'an chuqui tac ma' c'ux.

16 Wen ña'tan bajche' yom ma' mel ame q'uejlic ti jontolil chuqui tac ma' q'uel ti uts'at.

17 Come ti' yum_Λntel Dios ma'anic mi coltañonla we'el_Λl yic'ot uch'el. Mi' coltañonla toj b_Λ lac pusic'al yic'ot i ñ_Λch'tilel yic'ot i tijicñ_Λyel lac pusic'al ch'oyol b_Λ ti Ch'ujul b_Λ Espíritu.

18 Jini mu' b_Λ i taj i c'_Λjñibal ti Espíritu cha'an mi' melben i ye'tel Cristo, mi' q'uejlel ti uts'at ti' wut Dios yic'ot ti' wut winicob.

19 La' lac ña'tan chuqui tac yom cha'an ñ_Λch'_Λl mi la cajñel cha'an mi lac p'_Λtes_Λben lac b_Λ lac pusic'al.

20 Mach a jis_Λben i ye'tel Dios cha'an chuqui tac jach ma' c'ux. Melel, s_{ΛC} pejtelel chuqui tac an. Jiñ_Λch jontolil mi an winic mu' b_Λ i y_{ΛC}' ti yajlel i yermano cha'an chuqui tac jach mi' c'ux.

21 Mach ma' mel chuqui tac mi' y_Λsan ti mulil a wermano. Mach ma' techben tile bixel b_Λ i pusic'al o mi yamb_Λ wocol. Uts'at ma' c_Λy a c'ux we'el_Λl o mi vino o mi yan tac b_Λ mu' b_Λ i jis_Λben i xuc'tilel i pusic'al.

22 Mi an chuqui wola' ñop, ñopo ti' xuc'tilel a pusic'al ti' wut Dios. Tijicña jini mach b_Λ anic mi' tejchel tile bixel b_Λ i pusic'al cha'an i melbal mu' b_Λ i q'uel ti uts'at.

²³ Jini am b_Λ tile bixel b_Λ i pusic'al cha'an we'el_Λ mi' taj i mul mi tsi' c'uxu, come mach ti jump'ejlic i pusic'al tsi' c'uxu. Chuqui jach mi lac mel che' mach ti jump'ejlic lac pusic'al, jiñ_Λch mulil.

15

¹ Mi p'_Λt_Λlonla yom mi laj cuchbeñob i sajtemal jini tile bixelo' b_Λ i pusic'al. Mach yomic mi lac mel chuqui yom lac bajñel pusic'al.

² Ti jujuntiquilonla la' lac mel chuqui mi' mu-lañob lac pi'_Λlob cha'an mi' p'_Λt'añob, cha'an mi' tajob i wenlel.

³ Come Cristo ma'anic tsi' mele chuqui yom i bajñel pusic'al, che' bajche' ts'ijbubil: “Che' b_Λ tsi' y_Λ'leyetob, tsi' y_Λ'leyoñob”, che'en.

⁴ Jini ts'ijbubil b_Λ ti wajali tsa' ts'ijbunti cha'an mi laj c_Λntes_Λntel. I Ts'ijbujel Dios mi y_Λq'ueñonla i xuc'tilel yic'ot i ñuq'ues_Λntel lac pusic'al cha'an mi lac pijtan jini tal to b_Λ.

⁵ Jini Dios mu' b_Λ i y_Λq'ueñonla i xuc'tilel yic'ot i ñuq'ues_Λntel lac pusic'al la' i y_Λq'ueñetla la' tem ajñel ti jump'ejl jach la' pusic'al che' bajche' yom Cristo Jesús.

⁶ Che' jini, ti jump'ejl la' pusic'al mi mejlel la' tem tsictesan i ñucl_Λl Dios, i Tat lac Yum Jesucristo.

Jini wen t'an ti' tojlel gentilob

⁷ Jini cha'an p'_Λuntan la' b_Λ che' bajche' Cristo tsi' p'_Λuntayetla cha'an mi' ñuq'ues_Λntel Dios.

⁸ Come mic subeñetla tsa' tili Cristo Jesús i coltan jini tsepbilo' b_Λ i p_Λch_Λlel cha'an mi y_Λc' ti tsictiyel isujm_Λch Dios, cha'an ja'el mi' ts'_Λctesan jini t'an tsa' b_Λ subentiyob lac ñojte'el,

⁹ cha'an ja'el mi' tsictes_Λbeñob i ñucl_Λel Dios jini gentilob tsa' b_Λ p'unt_Λantiyob ti Dios, che' bajche' ts'ijbubil: “Jini cha'an mi caj c sub a ñucl_Λel ti' tojlel gentilob mi caj j c'ayibeñet a c'aba”, che'en Cristo.

¹⁰ Ts'ijbubil ja'el: “Tijicñesan la' pusic'al gentilet b_Λ la yic'ot i cha'año' b_Λ Dios”.

¹¹ Ts'ijbubil ja'el: “Subula i ñucl_Λel lac Yum pejtelel gentilet b_Λ la. La' i subob i ñucl_Λel ti pejtelel lum”.

¹² Tsi' y_{ΛΛ} Isaías ja'el: “Mi caj i tilel i p'olbal Isaí. Mi caj i tech i yum_Λantel ti' tojlel gentilob mu' b_Λ caj i pijtaño”, che'en.

¹³ Jini Dios mu' b_Λ i y_Λq'ueñonla lac pijtaya che' mi lac ñop, la' i bujt'esan la' pusic'al ti' tijicñayel yic'ot i ñach'tilel cha'an mi la' wen pijtan ti' p'_Λt_Λlel Ch'ujul b_Λ Espíritu.

¹⁴ Quermanojob cujil ti isujm, an cab_Λl i yutslel la' pusic'al yic'ot la' ña't_Λbal. La' wujil bajche' yom mi la' xic'ben la' b_Λ ti uts'at.

¹⁵ Ch'ejl c pusic'al tsac ts'ijbubeyetla chuqui yom mi la' cha' ña'tan. Ch'ejlon cha'an tsa' aq'uentiyon que'tel ti Dios

¹⁶ yic'ot i yutslel i pusic'al cha'an mic sub Cristo Jesús ti' tojlel gentilob. Mic subeñob i wen t'an Dios cha'an mi c_Λq'uen Dios jini gentilob cha'an i majtan. Jiñach yom b_Λ i ch'_Λm Dios, jini s_Λq'ues_Λbilo' b_Λ ti Ch'ujul b_Λ Espíritu.

¹⁷ Ti Cristo Jesús mij q'uel c b_Λ ti ñuc cha'an que'tel aq'uebilon ti Dios.

¹⁸ Come ma'anic chuqui com c tsictesan, cojach jini tsa' b_Λ i mele Cristo che' b_Λ tsi' c'añ_Λ c t'an yic'ot c melbal cha'an mi' jac'ob gentilob.

19 Tsi' pʌsʌ ñuc bʌ i yejtal i pʌtʌlel yic'ot bʌbʌq'uen tac bʌ ti' pʌtʌlel Ch'ujuł bʌ Espiritu. Che' jini, tsa'ix c laj subu i wen t'an Cristo c'ʌłʌł ti Jerusalén, c'ʌłʌł ti Ilírico.

20 Che'ʌch tsac cha'le wersa c sub jini wen t'an ba' maxto subilic i c'aba' Cristo ame wolic c cha' sub ba' tsi' ñaxan subu yambʌ winic.

21 Come ts'ijbubil: “Mi caj i c'otel i wut winicob mach bʌ anic tsa' subentiyob i sujmllel Cristo. Winicob maxto bʌ anic tsi' yubiyob mi caj i ch'ʌmbeñob isujm”, che'en.

Pablo yom majlel ti Roma

22 Jini cha'an cabʌł tsa' tijq'uiyon che' bʌ tsac ña'ta majlel ba' añetla.

23 Wʌle ma'anix que'tel ilayi ti ili lum tac. Anix cabʌł jab com majlel ba' añetla.

24 Baqui ora mic majlel ti España com j q'ueletla che' mic ñumel ba' añetla. Com ja'el mi la' pi'leñon majlel ba' samiyon che' bʌ tsa'ix c jula'tayetla.

25 Wʌle mic majlel ti Jerusalén cha'an mic ch'ʌmbeñob majlel i coltʌntel i cha'año' bʌ Dios.

26 Come jini año' bʌ ti Macedonia yic'ot ti Acaya tsi' yʌc'ʌyob ofrenda ti' yutslel i pusic'al cha'an i cha'año' bʌ Dios ti Jerusalén mach bʌ añobic i chubʌ'an.

27 Come yomob i yʌc', come añob i bet ti' tojlel israelob. Come jini gentilob tsa' tem aq'uentiyob i wenlel ti Dios yic'otob. Jini cha'an an ti' wenta cha'an mi' coltañob jini hermanojob ti Jerusalén ti' chubʌ'an.

28 Ba' ora mi cujtel ti jini e'tel, che' bʌ tsa'ix cʌq'ueyob i majtan, mi caj c ñumel ba' añetla che' mic majlel ti España.

29 Cujil che' mij c'otel ba' añetla, Cristo mi caj i yΛq'ueñonla cabΛ lac wenlel yic'ot lac tijicñΛyel ti jini wen t'an.

30 WΛle mic subeñetla, la' wocolic hermano-job cha'an ti lac Yum Jesucristo, yic'ot cha'an ti' yEspíritu mu' bΛ i yΛq'ueñonla laj c'uxbin lac bΛ, cha'lenla wersa quic'ot ti oración. Pejcanla Dios cha'añon,

31 cha'an ma'anic mic chujquel ti' c'Λb jini mach bΛ anic mi' ñopob ya' ti Judea, cha'an uts'at mi' ch'Λmob i majtan mu' bΛ caj cΛq'ueñob i cha'año' bΛ Dios ya' ti Jerusalén,

32 cha'an tijicña mij c'otel ba' añetla che' bajche' yom Dios cha'an mi' cha' ñuq'uesΛntel lac pusic'al.

33 Jini Dios mu' bΛ i yΛq'ueñonla i ñΛch'tilel lac pusic'al la' ajnic la' wic'ot ti la' pejtelel. Amén.

16

Cortesía tac

1 Com mi la' cΛn la quermana Febe am bΛ i ye'tel che' bajche' diácono ti' tojlel xñopt'añob mu' bΛ i tempañob i bΛ ya' ti Cencrea.

2 Come añetla ti lac Yum, jini cha'an pΛyΛla ochel ti la' wotot che' bajche' yom mi' melob jini i cha'año' bΛ Dios. Coltanla mi an chuqui yom come cabΛlix tsi' colta hermanojob. Tsi' coltayon ja'el.

3 Aq'ueñob cortesía Priscila yic'ot Aquila, come tsi' cha'leyob e'tel quic'ot ti Cristo Jesús.

4 Colel tsa' yΛΛ tsΛnsΛntelob cha'an tsi' coltayoñob. Mach joñonic jach mic subeñob wocolix i yΛΛ Priscila yic'ot Aquila, pero che'Λch mi' melob ja'el pejtelel jini gentilob baqui jach mi' tempañob i bΛ.

⁵ Aq'uenla cortesía ja'el xñopt'añob mu' b_Λ i tempañob i b_Λ ya' ti' yotot Aquila. Aq'uenla cortesía Epeneto ja'el mu' b_Λ j c'uxbin, tsa' b_Λ i ñaxan ñopo Cristo ya' ti Acaya.

⁶ Aq'uenla cortesía María tsa' b_Λ i cha'le cab_Λl e'tel cha'an mi' coltañetla.

⁷ Aq'uenla cortesía Andrónico yic'ot Junias, jini c pi'Λlob ti ñujp'el. Ñuc mi' q'uejlelob cha'an jini apóstolob. Ñaxan tsa' ochiyob ti Cristo, wi'ilix joñon.

⁸ Aq'uenla cortesía Amplias mu' b_Λ j c'uxbin ti lac Yum.

⁹ Aq'uenla cortesía Urbano ja'el woli b_Λ ti e'tel la quic'ot ti Cristo, yic'ot Estaquis mu' b_Λ j c'uxbin.

¹⁰ Aq'uenla cortesía Apeles tsa' b_Λ i cuchu wocol ti' ye'tel Cristo. Aq'uenla cortesía jini año' b_Λ ti' yotot Aristóbulo.

¹¹ Aq'uenla cortesía c pi'Λl Herodión. Aq'uenla cortesía jini año' b_Λ ti' yotot Narciso año' b_Λ ti lac Yum.

¹² Aq'uenla cortesía la quermanajob Trifena yic'ot Trifosa mu' b_Λ i cha'leñob e'tel ti lac Yum. Aq'uenla cortesía la quermana Pérsida, jini c'uxbibil b_Λ tsa' b_Λ i cha'le cab_Λl e'tel ti lac Yum.

¹³ Aq'uenla cortesía Rufo, wen ñuc b_Λ ti lac Yum, yic'ot i ña' tsa' b_Λ i c'uxbiyon che' bajche' c ña'.

¹⁴ Aq'uenla cortesía Asíncrito yic'ot Flegonte yic'ot Hermas yic'ot Patrobas yic'ot Hermes yic'ot yamb_Λ hermanajob ya' b_Λ añob.

¹⁵ Aq'uenla cortesía Filólogo yic'ot Julia yic'ot Nereo yic'ot i yijti'an yic'ot Olimpás yic'ot pejtelel i cha'año' b_Λ Dios ya' b_Λ añob.

¹⁶ Aq'uen la' b_Λ cortesía. Ts'ujts'un la' b_Λ ti uts'at. Pejtelel jini año' b_Λ ti Cristo baqui jach mi'

tempañob i b_Λ mi' y_Λq'ueñetla cortesía.

¹⁷ Hermanojob mic subeñetla ti wocol t'an ña'tanla majqui woli' y_Λsañetla ti mulil, mu' b_Λ i t'oxetla ti t'an ti' contra la' c_Λntes_Λntel. T_Λts'_Λ la' b_Λ ba' añob.

¹⁸ Come jini mu' b_Λ i cha'leñob bajche' jini ma'anic mi' jac'ob chuqui yom lac Yum Jesucristo. Jini jach mi' jac'ob chuqui yom i tsucul pusic'al. Ti maña jax b_Λ t'an yic'ot ti uts b_Λ t'an mi' lotiñob jini mach b_Λ añobic i ña't_Λbal.

¹⁹ Yujilob pejtél winicob uts'at bajche' mi la' jac'. Jini cha'an tijicñayon cha'añetla. Com mi la' wen c_Λn chuqui tac uts'at cha'an mi la' mel. Mach comic mi la' ñop jontolil.

²⁰ Jini Dios mu' b_Λ i y_Λq'ueñonla i ñ_Λch'tilel lac pusic'al mach jalix mi caj i y_Λq'ueñetla la' t'uchtan Satanás. La' ajnic la' wic'ot i yutslél i pusic'al lac Yum Jesús.

²¹ Mi' y_Λq'ueñetla cortesía Timoteo jini c pi'_Λl ti e'tel, che' ja'el Lucio yic'ot Jasón yic'ot Sosípater jini c pi'_Λlob.

²² Joñon Tercio mu' b_Λ c ts'ijban jini jun, mi c_Λq'ueñetla cortesía ti lac Yum.

²³ Mi' y_Λq'ueñetla cortesía Gayo i yum jini otot ba' jillemon yic'ot pejtelel xñopt'añob mu' b_Λ i tempañob i b_Λ ti' yotot. Mi' y_Λq'ueñetla cortesía Erasto jini tesorero cha'an tejclum. Mi' y_Λq'ueñetla cortesía la quermano Cuarto.

²⁴ La' ajnic i yutslél i pusic'al lac Yum Jesucristo la' wic'ot ti la' pejtelel. Amén.

La' tsictiyic i ñuclél Dios

²⁵ Dios mi mejlel i p'_Λtesañetla che' bajche' mi' y_Λl jini wen t'an mu' b_Λ c sub, mu' b_Λ i y_Λc' ti

cΛjñel Jesucristo. Come tsi' tsictesa jini mucul tac bΛ mach bΛ tsiquilic ti yambΛ ora c'ΛlΛl ti' cajibal pañimil.

²⁶ Tsictiyemix jini t'an wΛle, ts'ijbubil i cha'an x'alt'añob cha'an ti' mandar jini Dios am bΛ ti pejtelel ora. Tsi' yΛc'Λ ti cΛjñel ti pejtelel lum cha'an mi' jac'ob jini mu' bΛ i ñopob.

²⁷ Jini cojach bΛ Dios am bΛ i ña'tΛbal la' tsictiyic i ñucler ti pejtelel ora ti Jesucristo. Amén.

I T'an Dios
Bible without Deuterocanon in Chol Tumbala; ctu
(MX:ctu:Chol)

copyright © 1977 Wycliffe Bible Translators, Inc.

Language: Chol

Translation by: Wycliffe Bible Translators, Inc.

Chol, Tumbalá [ctu], Mexico

Copyright Information

© 1977, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Chol

© 1977, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

45de077a-5b47-572a-bd9d-72438a3be945